

牧令書輯要

同治七年三月初十日內閣奉

上諭丁日昌奏設局刊刻牧令各書一摺州縣爲親民之官地方之安危繫之丁日昌現擬編刊牧令各書頒發所屬卽著實力舉行俾各州縣得所效法其小學經史等編有裨學校者並著陸續刊刻廣爲流布至邪說傳奇爲風俗人心之害自應嚴行禁止著各省督撫飭屬一體查禁焚燬不准坊肆售賣以端士習而正民心欽此

牧令書原編楊序

自史記創爲循吏傳歷代因之而西京爲盛蓋西漢去古未遠淵源經術具有師承吏治蒸蒸不懈而及於古國朝重熙累洽

列聖相承以察吏爲圖治之先務

皇上御極以來慎簡收令其課最者往往

恩予召對不次擢遷尤稱異數誠以牧令乃親民之官以保赤之心爲心則一邑治卽推之天下而天下無不治高安未文端公輯歷代循吏傳始漢終元皆錄舊史並取散見他書者以附益之而未及於

昭代吳江陸朗甫中丞切問齋文鈔長沙賀耦耕制府

經世文編於我

朝循政良規搜羅宏富然非專爲牧令言也同歲生徐致初太守官水部時著有牧令書嘗出以相示爲目十八爲卷二十三博采旁收辭歸簡要不復列敘前代略觀梗概備三善焉古人筮仕之初比於學製發硯新試畀之大邑操刀實傷如古訓何是書條分理合確有持循雖在中材可勉而致其善一迺或專門名法以刻爲明用持巧心析律貳端陷民非罪跡弛之弊甚於迂疎是書弁以治原治術之醇根於學術其善二天下事常耆治之易變者治之難水旱盜賊自古有之治亂相因其奚以濟而籌荒戢暴備武具於是書復以保甲總其

綱無事則豫切講求有事則不虞并格其善三夫牧令
與唐虞之十有二牧春秋之令尹不同今特一邑之任
耳顧社稷民人惟牧令是寄本是書而遵行之因時制
宜精義致用彼西京之通於世務明習文法以經術潤
飾吏事者何以加茲余與太守皆岑至吳夙稔其有體
有用由工曹出守興安量移首郡涓川共楫雅慕前修
今以是書付之剞劂用之一邑而治推之天下而無不
治將見進而益上大其設施仰贊

聖天子察吏安民邁古循良之績匪直謨猷入告得拜
獻之先資已也是爲序

道光歲在著雍涒灘壯月日吉聊攝年愚第楊以增書

於關中節署之四來堂

讀書先要所謂讀書古金
聖不學則無術

牧令書原編自序

天下事莫不起於州縣州縣理則天下無不理稱州縣之職大約不外於更事久讀書多而讀書尤要蓋更事在既事之後讀書在未事之先且讀書雖未更事而可收更事之效所謂前事爲後事師也昔賢有見乎此言刑名錢穀有書言興利除害有書甚至記功過談因果有書當事者皆可奉爲龜鑒矣顧其書或列敘前代事或自成一家言而於我

朝二百年來循績嘉言未有人起而萃之余不揣固陋取暇參稽拮據漸多遂依類相從分爲若干卷綜既往以待將來集眾長以求一是以以此勸吏而福民庶幾爲

千里之跬步乎若夫得前人之良法美意而神明變化之則存乎讀是書者

道光十有八年戊戌嘉平朔安肅徐棟題於京邸之解
虛齋

牧令書輯要例言

一是書專言州縣蓋州縣親民之官較諸督撫司道尤爲切近故書中自治原以迄事集皆爲州縣而設末附憲綱祇大略言之亦行遠自邇之意也

一是書爲徐致初太守原編分類一十有八分卷二十有三采摭極爲宏富今芟蕪併複類仍其舊而卷存其十蓋蒐羅者懼軼其美故不厭繁而致用者在取其精故宜提要也

一庸吏庸言爲劉簾舫觀察除蠹保民之實政原編多載其文今以劉書另訂全刊是書不復重選亦原編中不選黃給諫福惠全書之意

一前哲選文多有評點以便觀覽是書原編評語略具而圈點不施今於全篇眼目處扼要處議論之剴切懇摯處悉加圈點附以散總各評既發明作者苦心且推廣行政實用庶使閱者披卷了然

一是書原編爵里姓氏列於每篇之首今仿經世文編例另立一卷弁之簡端以便檢閱

一是書名篇妙論多前賢閱歷有得之言前事之不忘後事之師也遵而行之無難近軼庸俗神而明之更將遠媲龔黃若夫博考昭代詳明之典制研究前史得失之圖籍知古知今有體有用則是書者又爲其嚆矢也夫

牧令書輯要姓名爵里考

顧炎武字寧人號亭林江蘇崑山人有天下郡國利病書振中隨筆日知錄亭林文集等書

陸世儀字道威號桴亭江蘇太倉人有桴亭文集思辨錄等書

趙廷臣字君鄰鑲黃旗漢軍順治乙酉由附貢生授知縣官至浙江總督諡清獻有奏疏

魏象樞字環極號庸齋直隸蔚州人順治丙戌進士官至刑部尚書諡敏果有寒松堂集

李之芳號鄴園山東武定人順治丁亥進士官至文華殿大學士諡文襄有奏疏

袁一相字輔宸順天宛平人順治壬辰官四川道

孫魯字孝若江蘇常熟人順治壬辰進士官至山西大

同府知府

賈漢復字膠侯號靜菴山西曲沃人順治甲午授都察院理事官官至兵部尙書有靜菴未定稿

于成龍字北溟山西永甯人順治丙申山副貢生知廣西羅城縣官至兩江總督諡清端有政書

許三禮字典三號西生河南安陽人順治辛丑進士官至副都御史督捕侍郎有政學合一集

趙申喬字松伍江蘇武進人康熙庚戌進士官至戶部尙書諡恭毅有恭毅賡稿自治官書

魏禧字冰叔一字叔子江西甯都人舉康熙己未博學鴻詞不赴有叔子文集

劉汶字魯川山東濟甯人康熙丁卯舉人

李紱字巨來號穆堂江西臨川人康熙己丑進士官至直隸總督禮部侍郎有穆堂初稿別稿

王植號憇思直隸深澤人康熙辛丑進士官知縣有崇雅堂稿嘗試語等書

沈起元字子大號敬亭江蘇太倉人康熙辛丑進士官至光祿寺卿有敬亭集

王士俊號犀月貴州平越人康熙辛丑進士官至河東總督有吏治學古編

俞森號存齋浙江錢塘人康熙中官至湖廣布政司參議有荒政叢書

聶繼模字樂山湖南衡山布衣有文集

胡衍虞字格臣號盤嶠野人山西太谷人有居官寡過錄

房廷楨字慎庵陝西三原人官江西豐城縣知縣見居官寡過錄

李漁字笠翁浙江人有資治新書

李士楨見資治新書

王元曦字湯谷山東人官浙江巡按

蔣國柱字君砥滿洲人官至浙江巡撫

潘杓燦字象承號月山浙江錢塘諸生有未信稿

熊宏備字勉菴江蘇淮安人有勉善堂格言

陳宏謀字汝咨號榕門廣西臨桂人雍正癸卯進士官
至東閣大學士諡文恭有培遠堂稿五種遺規等書

陳慶門字

陝西藍屋人雍正癸卯進士官至四川

綏定府知府

袁守定字易齋江西豐城人雍正庚戌進士官至禮部
祠祭司主事有圖民錄

田文鏡字

正黃旗漢軍山縣丞官至河東總督兵

部尙書諡端肅有撫豫宣化錄

藍鼎元字玉霖號鹿洲福建漳浦人官至廣東廣州府

知府有鹿洲初稿續稿鹿洲公案平臺紀略等書

朱澤澐字止泉江蘇寶應人有止泉集朱子聖學考略等書

喬光烈字敬亭號潤齋江蘇上海人乾隆丁巳進士官至湖南巡撫有最樂堂集

官獻瑤字瑜卿號石溪福建安溪人乾隆己未進士官至司經局洗馬有石溪文集

黃可潤字澤夫號壺溪福建龍溪人乾隆己未進士官至直隸河間府知府有畿輔見聞錄

袁枚字子才號簡齋浙江錢塘人乾隆己未進士官江蘇江甯縣知縣有小倉山房集

至雲南布政使有詩雲山房集

三

宜施道有 贈清堂稿東溪居士文集

永定河南岸同知

至船建巡撫有年譜

沈峻字丹崖號存圃直隸天津人乾隆甲午副榜官廣東吳川縣知縣

汪輝祖字煥曾浙江蕭山人乾隆乙未進士官至湖南道州知州有佐治藥言學治臆說等書

周錫溥號半帆湖南湘陰人乾隆乙未進士官知縣有安愚齋集

周鎬字懷西號嶺山江蘇金匱人乾隆己亥舉人官至福建漳州府知府有嶺山類稿

鄧振同號涵山福建閩縣人乾隆己亥舉人官直隸臨城縣知縣有涵山文集

謝振定號薌泉湖南湘鄉人乾隆庚子進士官至御史

有知恥齋集

沈夢蘭號古村浙江烏程人乾隆癸卯舉人官湖北宜都縣知縣有所願學齋書鈔

謝金鑾字退谷福建侯官人乾隆乙卯舉人官教諭有教諭語漳泉治法論等書

方積號玉堂安徽定遠人乾隆己酉拔貢官至四川布政使有敬恕堂集

曾鏞號鯨堂浙江泰順人乾隆己酉拔貢官湖北知縣有復齋集

洪亮吉字稚存號北江江蘇陽湖人乾隆庚戌進士官編修有卷施閣集

張師誠字心友號蘭渚浙江歸安人乾隆庚戌進士由
編修官至倉場侍郎有自訂年譜省緣室集拜颺存
稿書吏法戒等書

陸向榮字樹聲號欣木直隸清苑人乾隆甲寅舉人官
廣東署韶州府知府有瘦石山房筆記

白如珍字元峯江西宜黃人乾隆中爲安徽撫署幕賓
有刑名一得

朱 字性齋江蘇松江人乾隆中官至總憲有作吏
管見

程含章號月川雲南景南廳舉人官至山東巡撫有
南江右等集

嚴如煜號樂圃湖南澧浦人嘉慶丙辰舉孝廉方正授
知縣官至陝西按察使有苗防備覽洋防輯要三省
邊防備覽等書

楊景仁字靜巖江蘇常熟人嘉慶戊午舉人官至刑部
員外郎有式敬編籌濟編等書

陳斌字陶鄰號白雲浙江德清人嘉慶己未進士官安
徽同知有白雲文集

張士元號鱸江江蘇吳江人嘉慶庚申舉人有嘉樹山
房集

栗毓美字樸園山西渾源州人嘉慶辛酉拔貢官至河
南山東河道總督諡恭勤有實政遺編

物今書輶要姓名錄
陶澍號雲汀湖南安化人嘉慶壬戌進士官至兩江總督諡文毅有印心石屋文集

齊彥槐字夢樹號梅麓安徽婺源人嘉慶己巳進士官江蘇金匱縣知縣有文集

裕謙號魯山滿洲鑲黃旗人嘉慶丁丑進士官至兩江總督諡靖節有勉益齋偶存稿

謝玉珩字寶書號鶴齡陝西安康人嘉慶庚辰進士官四川昭化縣知縣

王鳳生字振軒號竹嶼安徽婺源人由通判官至兩淮鹽運使有越中從政錄宋州從政錄學治體行錄等

書

張杰字伯良湖南澧州人官直隸深州知州

何士祁字仲京號竹簫浙江山陰人道光壬午進士官
江蘇川沙廳同知有學治補說川沙廳志等書

何耿繩字正甫號玉民山西靈石人道光壬午進士官
直隸大名府知府有學治一得編

徐文弼字襄右江西豐城人官知縣有吏治懸鏡

梁鳳翔見孝感縣志

王有孚號白香江蘇元和諸生有一得偶談不礙軒讀
律六種等書

牧令書輯要總目

卷一

治原

政略

卷二

持家

用人

事上

接下

取善

屏惡

卷三

農桑

賦役

卷四

籌荒上

卷五

籌荒下

卷六

保息

教化

卷七

刑名上

卷八

刑名下

卷九

戡暴

備武

卷十

事彙

憲綱

牧令書輯要總目終

皇帝御極之七載日昌由蘇藩司蒙

恩擢任巡撫奏請於省城開設書局首刊吏治諸書既
奉

俞旨爰將安肅徐氏棟所輯牧令書刪存十卷詳加評
語揭明肯綮以爲凡有州縣責者先路之導夫積
州縣爲府積府爲行省積行省爲天下故天下者
州縣之積也自古及今天下治亂未有不起於州
縣者州縣無不治而天下治矣江蘇兵燹之餘僅
裏下河一隅未經蹂躪又有決隄泛溢之患其他
州縣則皆殘喘未復汙萊未闢所以撫摩創痍翦
除蠹害望治於賢牧令者尤亟綜今兩藩司所屬

實任需次之員殆逾數百其學優從政斟酌古今以求治理者固不敢必其無顧以吳中仕宦習爲侈蕩無論公趨私聚但言某人之聲氣通與不通車裘之麗與不麗趨跽應對之工與不工其一二談及民生利弊則羣起侮笑之指目爲矯且腐風氣所趨牢不可破於是有意者亦復噤不敢發隨風而靡迨至身膺民社懵然不知刑名錢穀爲何事催科撫字爲何物凡與上交接者不能不聽之幕友與下交接者不能不聽之門丁巾行則書吏主之勾攝則胥役主之遲之又久受餌益深牢籠益固雖欲自圖振拔而有所不能揆之筮仕之初

心豈頗碌碌如此哉而卒至如此者則山居恆於從政之體用綱目並未講求故一旦得所藉手有如盲夫夜行不能不聽命於他人之指揮夫治宮室必延工師治疾病必延巫醫夫人知之也今以工師治疾病匪惟病大色然駭工師亦必遜謝不敢往術藝之微尙且如此其頓顧於臨民大事舉漫不相習之人亦且毅然受之而不辭其發之於己而施之於人者抑可不問而知已嗚呼吾民之疾困如此學優從政者已未易一二觀卽以政學者亦復寥落其人此余於牧令一書所以不能不亟亟出而與學治諸君子共勉之也是書所載皆

我

朝名臣循吏懿蹟嘉言施之當今無虞扞格太史公
云取其近已而俗變相類比物此志也竊願同志
者潛心玩繹身體力行由是而采精遺粗沿流溯
源勤求民隱飾以經術其始以是書爲楷模其終
且不僅以是書自封域濡染所及將向之侮且笑
者亦復視此爲切己之學則舉州縣皆無不治豈
特吾江蘇哉工既竣謹書數語於後同治八年春
正月豐順丁日昌

牧令書輯要卷一目錄

治原

與泰安各屬

李紱

誠子書

聶繼模

與荆雪濤論羅城事書

于成龍

循吏約

沈起元

申飭官箴檄

十七則錄七

陳宏謀

仕學一貫錄

陳慶門

勤職

汪輝祖

通論居官

汪輝祖

居官致用

謝金鑾

與山左屬官書

程含章

答周仲和書

張士元

政略

筮仕

潘杓燦

居官寡過錄

胡衍虞

候補

何士祁

補缺

何士祁

到任

何耿繩

嘗試語

王植

勤職

汪輝祖

越中從政錄

王鳳生

作吏管見

朱

諮詢地方利弊論

陳宏謀

答門生王禮圻問作令書

袁枚

陞遷

潘杓燦

收令書輯要卷一目錄終

牧令書輯要卷一

安肅徐棟致初原編

豐順丁曰昌雨生選評

治原

設官凡以爲民也。而徵諸民必本諸身。其道自生民以來。未之或易。不明乎此。而欲治民。非空談卽雜霸耳。故以治原始。

與泰安各屬

李紱

居官大戒第一。蒙蔽。蓋上下內外。非蒙蔽無以行其奸欺也。蒙蔽之在內者。有官親家人。蒙蔽之在外者。有猾書蠹役。內外勾連。鬻情賣法。則爲官者孤立無與。而坐

聽聲名之敗裂其亦危險矣哉。獨是官受蒙蔽人以為官之不明也。不知蒙蔽之害中於不明者十之二三。中於不勤者十之七八。蓋人即智識短淺而事事躬親則奸欺者不能盡售其術。惟因循積壓怠玩廢弛則顯予人以作奸叢弊之地。而欲人之不欺我也難矣。迨乎既受蒙蔽而後以察察之智勝之一人之智不足敵眾人之智而狡黠者或反得迎其私智而巧中之是皆治之賊也。今欲力祛諸弊惟有一主於勤。勤省閱而案牘之壓閣者少矣。勤勾稽而出入之侵欺者遠矣。鞠訊勤而情偽悉孰能亂我聰明。決判勤而拘繫釋誰得肆其魚肉。且閭閻之所惡者訟師。勤庶獄而雀鼠息爭。訟師之

伎倆無所試。鄉里之所苦者盜賊。勤巡閱而獲符遠跡。盜賊之根蔓無所滋。一勤而百事治。何蒙蔽之足患乎。至於勤之明效。大驗昭人耳目。而人不務於勤者。則自有故。蓋勤卽仁也。無病瘵在抱之隱。必不能孳孳於民事。而性情嗜好之與俱。勤卽誠也。無旦明對越之心。必不能懷懷於官箴。而飲食起處之弗違。然獨不思君上以職司責我。統四境之農桑教化。待治於官。而爲官者因循浮沈。莫之綜理。其可以對君乎。百姓以父母仰我。合眾人之疾苦。訟訴待命於庭。而爲官者詩酒聲色。莫之省顧。其可以對民乎。某與各寅好同。舟秦汶。其聰明各有優絀。不能強同。其材力各有強弱。不能強齊。

其學問各有淺深。不能強合。各用所長。事無不集。惟所以對乎。君民而力除其壅蔽者。則非勤莫由。某雖不敏。竊願與各寅好共勉之。

揭出勤字。以爲居官要訣。而不勤者。由於不仁。不誠。可謂窮原探本之論。詩曰。文王既勤止。文王猶勤。況下此乎。勤之一字。爲居官之本。亦爲入聖之梯。易言自強。書言無逸。大學言口新。中庸言無息。皆此勤字也。王道聖功。本無二理。

誠子書

嵇繼模

爾在官。不宜數問家事。道遠鴻稀。徒亂人意。正以無家。信爲平安耳。山僻知縣事簡。責輕最足鈍人志氣。須時

得局公待且陶悅情
之員今之牧民者日上三
年猶在夢寐謂此應如聞
破曉鐘也

時將此心提醒激發無事尋出有事有事終歸無事今
服官年餘民情悉熟正好興利除害若因地方褊小上
司或存寬恕偷安藏拙日成痿痺無論將來不克大有
所爲卽何以對此山谷愚民且何以無負師門指授見
答黃孝廉札有爲報先生春睡熟語此大不可詩曰夙
興夜寐無忝爾所生居官者宜晚眠早起頭柳頭漱二
柳視事雖無事亦然庶幾習慣成性後來猝任繁劇不
覺其勞翻爲受用長公負文章遭時不偶憤激而談何
必拾其唾餘耶山路崎嶇歷多虎患涉水尤險因公出
門須多帶壯役持烏槍夾護不可省錢減從自輕民社
之身又不可於途中旅次過行瑣賁此輩跟隨亦有可

國宜化然衙門中門丁
者雖有不和利以虐民
者惟發其法以服之且少
其人而優陳之則自不致
化爲瘼矣

憫御之以禮撫之以恩二者相需偏倚則害流民在衙
供役者亦然邑中除去五患人咸爲爾慶我每思及反
覺蹙然李忠定公譬此輩猶痰乘虛火而生火降水生
仍化爲精痰與精豈二物而頃刻變化如此天下無德
精而離痰者皆自吾身生在反身而已此後須設法處
置無使數千里外老人魂夢作惡也爾家書屢言辦過
軍需并未賠墊此殊可疑湖南州縣無不賠墊者況爾
初任幾戶窮民額糧不滿二萬又適逢荒歉之歲肯於
此時加一分恩全活實多兼可不誤大伴人笑爾迂我
心彌喜若云全不賠墊則將取之誰耶若爾曲爲此言
冀寬我心猶爲有說然爾視我爲何如人好消息惡消

息以善養不以祿養彼閭閻中人能分析言之況八旬
髮眉老翁哉此後凡遇上司公文關係地方興除須設
法行之至萬不能爲而後已大抵自己節省正圖爲民
閒興事非以節省爲身家計同一節省其中殊有義利
之分如此俸薪須寄回爲歲時祭祖用倘有參罰卽不
必如數寄毋致上欺祖宗且可爲辦事疎忽戒養廉銀
兩聽爾爲地方使用邇邑僅得二社目前卽須謀增建
窮戚友亦不宜忽然京師鄉老重修會館此是義舉旣
有札通知須量力應答年誼中曾有以詩文送贈者須
有以報之如一時不能不妨遲致空札告窮苦此最是
習氣取人厭罵且非誠心待人之道也往省見上司有

必需衣服須如式製就矯情示儉實非中道知州去知府尙遠然既屬直隸州卽當以知府相待須小心敬奉又不可違道干求盡所當爲而已官廳聚會更屬是非之場大縣遇小縣未免驕氣彼自器小與我何預然切不可以小縣倣之又不可存鄙薄心須如弟之事兄如庶子之待嫡子如鄉裏人上街事事請教街上人可否在我間誠能感人謙則受益古今不易之理也官廳子內不可自立崖岸與人不和又不可隨人嬉笑須澹心靜坐思著地方事務若有要件更須記清原委以便傳呼對答山城不得良幕自辦未爲不可但須事事留心功過有所考驗更須將錯誤處觸類旁通漸覺過少

牢獄與囚隔等何如此體
血奈何自引往往於無罪
者應行禁抑且任差役凌
虐而不為早結調此
能無動念

晉才者往往於不通文字
多漢矣然諸須代受者
設想

乃有進步偶有微功益須加勉不可懷歡喜心阻人志
氣鎮安向來固圉空虛爾到任後頗多禁犯但須如法
處治不可存怒恨心寒暑病痛亦宜加恤我雖非官醫
每人禁視囚病痛給以藥物十餘年來地方官因爾通
籍不便延我入禁視病然我自樂為之爾母亦親手做
丸藥近來益以此為事爾體此意自宜於牢獄盡心山
中地廣人稀責令墾荒原屬要著但不時獎勵切不可
差役巡查如屬己業不可強令報官有願領執照者即
時給付不可使書吏勒索銀錢日積月累以圖功效生
產文理晦塞耐煩開導略可取即加獎勵又當出以誠
心莊語不可雜一毫戲嫚此二事皆難一時見功須從

讀此則做小邑者不可自菲薄矣

容爲之不可始勤終倦。我最愛雷先生與爾書云。種子播地。自有發生。爾在鎮安。正播種子時。但須播一嘉種。俟將來發生耳。知縣是親民官。小邑知縣更好親民。作得一事。民間卽沾一事之惠。古有小邑知縣實心爲民造福一兩事。竟血食千百年。土人或呼爲某爺某公。視彼高位顯秩。去來若途人者。何如哉。蒲城羅明府名文思者。查鄉會年譜。都無其人。在省契合。且多勸勉。此最難得。宜相處在師友間。然不可以此望之人人。爾性狷介。吾不慮其不親賢。慮過以賢望人也。州縣中間亦有曾係中丞公加意者。卒望白簡。可見大人愛憎。至公無私。爾蒙格外期望。吾旣喜復憂。爾能自憂。卽吾之喜也。

孟子云。蒞官不敬。非孝也。我老矣。因爾作官。益信此言。糟糠之婦。布裙荆釵。安之若素。不致累爾。萬水千山。來此窮鄉。情殊可念。當相待以禮。凡有不及。須以情恕。官場面孔。毫不宜施。鎮安僻陋。爾子不致染纖袴習氣。吾無他慮。但暇宜課以讀書。爾亦藉此得與典籍相近。至於律文精奧。尤須字字研究。中庸所謂憲章。卽此也。詎得以法家者言。忽過護送人等。屬令到卽回家。勿聽久留。署聞爾士民時時念我。足見風俗醇古。我身健尙能復來得觀地方起色爲樂。餘言爾妻自悉。不服談。

經世文編云。樂山聶翁。布衣也。精於醫。仲子黉令鎮安。翁寄書誡之。陳榕門相國撫陝時。嘗手批此。

書三次并命撰入鎮安縣志。今讀其書。於吏治民生言之親切有味。又不近於迂腐。身膺民社者。宜手錄一編。以當晨鐘暮鼓。

與周雪濤論羅城事書

于成龍

廣西柳州之羅城。偏在山隅。土司環繞。山如劒排。水如湯沸。蠻煙瘴雨。北人居此。生還者什不一二。土民有獠獍狼狽之種。帶刀執槍。性好鬪殺。父子兄弟。反目操戈。恬不知怪。順治十六年冬。初入版籍。成龍於十八年謁選。得是邑。旣注選。親者不以爲親。故者不以爲故。友者不以爲友。賒腳錢。寄口食。行至清源。同年生王君吉人。反覆開譬。謂非吉祥地。夙知成龍家食。尙可自給。勸勿

往以繳憑爲高。成龍時年四十五矣。私心自度讀書半生。曾知見利勿趨。見害勿避。古人義不辭難之說。何謂也。揮淚而別。五月抵家。別母及妻子。典賣田屋得百金。攜蒼頭五人往。其餘田產文券交付長子。但云我作官。不管爾爾。作人莫念我。攬轡登程。不復回顧。此時壯氣直欲吞猺獞。而餐煙瘴也。行及湖南冷水灘。一病顛連。至桂林謁上司。皆見羸體伶仃。詢及病狀。驚憫特異。惟勸以方藥調治。勿亟赴羅。抱疴之人。豪氣消磨殆盡。及柳州稍瘥。尙未知羅城在何許也。羅城與融縣沙鰲連界。行至沙鰲。遇許鄉老。細詢之。乃知對山卽是。登山一望。蒿草滿目。無人行徑。繞山都是營壘。瘴雲慘澹。苦霧

淒迷。回憶同年生之忠告不置也。八月二十日入縣中。一如郭外居民六家。草屋數椽。寄居漢壽亭侯廟支牀。周倉背後。黎明到縣廷。無門垣。兩堦茅草。一如荒郊。中堂草屋三間。東斷爲賓館。西斷爲書吏舍。中開一門。入爲內宅。茅屋三間。四圍皆無牆壁。鬱從中來。病臥月餘。從僕環向而泣。扶病理事。立意修善以回天意。凡有陋弊。清察釐革。無何一僕死。餘僕皆病。康熙元年正月。謀爲歸計。自忖一官落魄。復何恨。諸僕無罪。何苦貽累。丁徭令各逃生。一僕蘇朝卿仗義大言。若今生當死於此。去亦不得活。棄主人流落他鄉。卽生亦何爲哀哉。幸有此也。當時通詳邊荒久反之地。一官一僕。難以理事。乞

賜生歸當事者置之一哂而已。其年逃僕歸家。大兒悲念天涯萬里。一主一僕。何以安身。續覓四僕來。而三僕皆登鬼錄。止存一僕。晝夜號咷。一如風魔。事處兩難。一人難以遠行。欲遣前僕伴歸。則子身更苦。無如前僕亦切思歸之念。聽其浩然長往。萬里一身。生死莫能自主。夜枕一刀牀頭樹一槍。爲護身符。然搔癢雖頑。帖然相安。事到萬不得已時。亦得勉強爲之。申明保甲。不得帶刀攜槍。咸遵無犯。閒有截路傷命無蹤盜情。務期緝獲。盡心推詳。必得真實。立時誅戮。懸首郊野。漸次人心信服。地方安靜。上臺采訪真確。於是有一大事解。省小事。卽行處決之。通行境內。雖平苦與柳城西鄉爲鄰。此地祖

孫父子生長爲賊。肆害無已。申明當事。輒以盜案爲艱。置之高閣。成龍思漸不可長。身爲民父母。而可使子弟罹殃咎乎。約集鄉民。練兵親督勦殺。椎牛盟誓。齊力攻擊。先發牌修路。刻日進攻。此未奉委命而專征。自揣功成。亦在不赦之條。但奮不顧身。爲民而死。勝於瘴病而死也。渠魁俛首。乞恩講和。擄掠男女牛畜皆送還。仍約每年十月犒賞牛酒。敢有侵我境者。竟行勦滅。於是鄰盜漸息。而上臺采訪更確。反厭各州縣之請兵不已。報盜不休爲多事也。嗣後官民親睦。或三日或六日環集問安。如家人父子。言及家信。沓絕悲痛。如切己膚。土謠武陽岡三年必一反。比及三年。食寢不安。人心旣和。謠

如此年紀如此苦缺只要耐得苦捨得命後來便做出許多事業今人懷安無遠圖者曷不二復斯文

言不驗。又云三年一小勦。五年一大勦。比及五年。又復無事。而民俗婚喪之事。亦皆行之以禮。感之以情。謬蒙上臺賞識。列之薦章。遂有四川合州之擢。自數年來。本非爲功名富貴計。止欲生歸故里。日食二餐。或日食一餐。讀書堂上。坐睡堂上。毛頭赤腳。無復官長體。夜酒一壺。直錢四文。讀唐詩寫俚語下之。有時痛哭流涕。並不知杯內之爲酒。爲涕也。閒常祝城隍。我無一毫虧心事。當令早還鄉井。今得遇合。豈非上蒼默佑。回思同寅諸人。死亡無一得脫。是以赴蜀之日。益勵前操。至死不變。此數年之大概也。偶書寄以發知己萬里一嘅。

陳廷敬曰。公嘗自言。一生得力在令羅城。蓋與王

文成之龍場同一動心忍性。故余於公傳特載此書。俾世人知公澹泊堅剛之操所自來云。

循吏約

沈起元

分疆守土之官。未有若知縣之於民至親而至切者也。故易於見功。亦難於稱職。然才識之高者不足恃。下者不足慮。惟視其心何如耳。才有不同。心無不同也。識有不一。心無不一也。心者何。一曰實心。國家激敘官方吏治章程。纖悉具備。特患視爲具文故事。苟可以塞上司之責。免功令之罰。便爲了事。巧於趨避。競尚浮華。則雖有良法美意。都成虛設。於地方毫無補益。苟能將士習民風。獄訟賦役。水利盜賊諸事。凡一切令甲之所垂。

所謂誠其意者毋自欺也
如惡惡真如好好色實心
理而誠意之謂

憲。檄。之。所。飭。民。生。之。所。繫。國。計。之。所。關。一。實。心。整。
理。如。飲。食。衣。服。之。切。己。饑。必。求。飽。寒。必。求。暖。不。因。上。臺。
督。責。而。粉。飾。不。因。同。列。異。同。而。依。違。一。民。未。安。一。事。未。
究。寢。食。不。敢。甯。也。焦。勞。不。敢。恤。也。由。是。則。才。高。者。尋。理。
必。細。操。持。必。堅。更。無。難。事。足。以。沮。我。何。患。政。之。不。立。雖。
才。識。稍。下。而。心。之。所。至。識。自。開。明。才。自。展。拓。於。境。內。必。
日。有。起。色。矣。二。曰。虛。心。夫。心。本。靈。明。不。虛。則。蔽。有。欲。念。
則。不。虛。好。利。好。名。皆。欲。念。也。有。成。見。則。不。虛。務。嚴。務。寬。
皆。成。見。也。心。既。不。虛。於。是。是。非。之。衡。不。能。定。情。偽。之。
隱。不。能。燭。動。而。輒。誤。無。所。適。從。要。皆。蔽。之。爲。患。也。惟。徹。
其。所。蔽。使。好。利。好。名。之。念。無。所。介。於。其。中。不。計。祿。位。之。

得失不問俗情之毀譽。則事之是非。民之情僞。自無遁形。事至而應。就事論事。不以姑息市恩。不以執泥行法。成見一空。漸歸無我。有過卽改。何妨舍己從人。有善不矜。常覺彼長我短。虛則能受。虛則生明。豈獨居官之切務。實亦治心之要訣。矧顧心之所以不能實。與不能虛者。其病根又有二。一在不知其苦。蓋勞心之苦。甚於勞力。不獨牧令爲然。而牧令尤甚。自設官分職以來。固以極勞苦之事。責之而非以爲我逸樂之具矣。今試以一身爲一家之主。仰事俯畜。胥責之一人。卽數口之家。無不以爲苦者。況牧令地大者數十萬戶。邑小者數萬戶。其數萬戶與數十萬戶之身家。羣責之牧令之一身。而

以做官爲樂者其居心已
不可問其行事亦必無可

尚得以爲我逸樂之具耶。自世教之衰。徒知以仕進爲榮。寵得一美官。親友握手相賀。而爲官者亦自以爲得不念其苦也。比者。朝廷清明。綱紀整肅。貪黷恣睢之行。無復敢試。亦既知飲冰茹蘗之況矣。夫飲冰茹蘗之況。苦況也。而猶未知苦。乃其職也不盡其苦。不安於苦。則苟可以愉安。可以逸欲。怠氣卽乘。而又安能實心與虛心哉。故必知苦。乃盡其職。我盡其苦。而民乃得樂。我安其苦。而心乃日休。自必孳孳暨暨。夙夜不遑。甘入於苦之中。而職無不盡矣。一在不知其重。夫億兆芸生。不知其幾。而居官者千百中。一二一命之士。皆上天之所厚也。天心愛民。而付之君以治斯民。又以不能獨治而

分任之百職。試觀今日。自牧令而上。惟大學士總六部之政務。自大學士而下。亦惟牧令總六部之根基。是豈惟潔己奉公。卽爲臣職之修。有一事未盡理。一物未得所。便非君上命我之意。卽非上天生我之意。誠念及此。而精神奮勵。卽才識由是而凝鍊矣。知斯二者。自能實心行事。虛心自考。而肯苟且從事乎。

申飭官箴檄

十則錄七

陳宏謀

朝廷設官。原以爲民。官必愛民。乃爲盡職。故府州縣官。皆以知爲名。又名之曰地方官。謂地方之事。府州縣當無所不知也。百姓稱官曰父母。自稱曰子民。謂民間苦樂。府州縣當無不關切如一家也。屢奉

上諭令惠愛生民力行教養。

聖訓煌煌至明至切近又奉

旨准部覆奏行令地方官徧歷鄉村體驗興舉飭禁事宜有無成效無非欲地方官周知民事之意。本部院因部文內所載應興應革事宜雖大端不外乎此而各省風土物宜不同奉行難以拘泥已就陝省情形條列利弊徧布曉諭一則使小民知官司之政令有所遵從一則使官司知民間之利弊有所措手惟是巡訪雖在臨時而籌畫端在平日官衙之內未曾有一番講求下鄉之時必不能有一番措置徒然遊目四鄉究竟仍無實際。本部院每見屬員常切切以此勸勉而屬員眾多接

見時少亦難領悉。今酌定十條。合行通飭。仰司官吏卽使遵照轉行各屬。移知臬司各道實力遵行。府州並移丞倅一體遵照。

一曰存實心。心爲一身主宰。萬事根苗。有心有餘而力不逮者。未有無此心而能爲此事者也。司牧之官。先辦得一點不容已於斯民之心。乃能隨時體察。爲民造福。如興一利也。惟恐不利於民。惟恐利民不久。更惟恐利少而害多。除一弊也。惟恐害之不去。惟恐此時無害而將來有害。更惟恐一害未去。別害又生。徹始徹終。有一番籌畫。防微杜漸。有一番布置。不如此則心有不安。果能如此。於民有益。卽於己有累。亦所

今之從政者只圖回覆上
官豈尚計及百姓實見一
官只顧上行文書下行文
書從不顧百姓由不將百
姓當作自己子弟看待故
也

不惜有此實心而才情不逮亦必隨其分量有所成
就若無此實心視民間苦樂漠不關心雖有才智徒
工粉飾爭趨巧便雖有良法亦不能行古云如保赤
子心誠求之又云處官事如家事皆實心之謂也每
事止圖可以回覆上官不顧可對士民與否者皆不
實心之故也願各屬每日之內常切提撕隨事檢點
果能有此一點爲民實心然後可以商量興利除弊
之事

一曰堅操持功令森嚴耳目昭著稍知自愛亦自有所
畏而不敢爲然義利關頭未能看破苟得念慮難遽
掃除或蹤跡詭祕而冀人之不覺或借端巧取而以

此事在地方官以爲無
關。殊不知端倪一露
則其家丁即從附和
其弊有不可勝言者

爲有說之辭。如徵銀多捉短封。收米捐勒尖收。買穀
則短價浮量。借穀則平出尖入。以及勒借鋪戶。派累
甲民。私收禮物。投拜門生。或捐監有使費。紳衿有交
結。喜慶令節。暗受餽遺。日用柴薪。短發價值。但有一
事。卽思染指。不思養廉。常俸之外。絕少無礙之錢糧。
昏夜暗室之中。焉有不知之財物。卽或一時瞞過。而
心中有慾。割斷必不公平。措置必多乖戾。言動必不
光明。暗地必多怨咨。事後難逃指摘。究竟所得無多。
而同官掣肘。書役穿鼻。杌隄挾制。家人招搖聲名。一
玷後悔無窮矣。故必掃除慾念。堅固操持。然後可以
正己。可以正人。可以興利。可以除弊也。

耐煩勞三字即李穆堂先生所請勤字也名臣皆如此欲爲循吏者豈可不如此

今之問案每遇情節糾纏輒云難候提訊甚至一審再審終年不結其病在問卷時不耐煩勞以致一生

一曰耐煩勞。一郡一邑何事不待理於我何人不仰望於我。每日所事非關百姓身家性命。卽關地方風俗人心。其中情僞百出。疑難多端。小心翼翼。猶恐有誤。豈可有厭煩之心。惟日孜孜。猶恐不及。豈可有憚勞之心。故人謂居官則可免煩勞。不知正惟居官則不能不煩勞。亦不敢不煩勞也。看案而耐煩勞。則原委透明。審事而耐煩勞。則虛實可辨。立讞而耐煩勞。則供看明切。檢驗而耐煩勞。則屍傷明確。後來案無疑竇。鞫囚而耐煩勞。則反覆研訊。不事刑求。真情可得。批詞而耐煩勞。則批斷切中。小民不致守候再告。稟覆而耐煩勞。則確切對鍼。不致答非所問。踏勘而耐

堂上使對毫無主張而臨
審時之煩勞殆猶其後
焉者也

煩勞。則界址分明。堂審更有把握。簽票而耐煩勞。則
票內字句輕重。名目多寡。俱有斟酌。胥役不能蒙混。
而里民免無端之驚擾。絕意外之株連。耐煩勞以興
利。則利雖難而必可興。耐煩勞以除害。則害雖大而
必可去。故有官司耐一時之煩勞。而四境受無窮之
福澤。卽有官司厭一時之煩勞。而百姓受無窮之擾
累者矣。況事雖極繁雜。自有端緒。能耐煩勞。則心與
事習。理得心安。久之將有不煩而得不勞。而理之效
近見各屬明知事之可爲。職之當爲。而或畏其難。或
以爲迂。或陽奉而陰違。或始勤而終怠。卽如日行案
件。亦有潦草塞責。得過且過。甚至上司公文並不全

每見閱文書者。先將札首
聊看數語。卽從札到後看

看頒發條款。並未細閱。偶遇叩問。驚愕失措。茫然不知。皆坐不耐煩勞之病。苟非充類至盡。不能自祛痼習。故以此爲諸君勸。

一曰戒揣摩。人有本心事。有定理。當時不免浮言。事後豈無公論。無如仕途惡習。不講實在是非。惟以私心摹擬。卽如舉一人也。不以其政蹟過人。而以爲因某事爲上臺。偏喜也。不然則某人吹拂也。劾一人也。不以爲奉職無狀。而以爲因某事觸上臺之忌也。不然則某人中傷也。豈上臺全無公是公非。而祇有偏好偏惡耶。全以私心揣測上司。一倡百和。而激揚之公泯。勸戒之意不昭矣。至於辦理案件。一有私意揣摩。

凡巧宦皆不免於揣摩
遷就則實中無異是非矣

必至是非混淆。輕重倒置。何以彰法紀而服人心。況有揣摩之心。便工迎合之計。奔競鑽營。無所不至。其有關於吏治風俗人品心術。殊非淺鮮。所願各屬。泣民理事。本心而推。循理而行。自守以正。相勉以公。論人則平心而察。在己則自反而思。毋囿於積習。毋惑於浮言。去一分揣摩。卽擴充一分天良。卽存一分公道。爲自己展布事業。爲地方維持風教。卽爲朝廷推廣德意矣。

一曰禁擾累居官而有意擾民累民。雖愚不至此。但鄉民至愚。地方甚廣。奸胥猾吏。地方奸徒。情僞百出。稍有舉動。便可藉端擾累。故無論官政煩苛。卽良法美

能防閑卽能體察故拏獲
累尤以防閑爲要

上司不察累下屬下屬自
不敢擿累百姓故正本清

意而體察未到。擾累不淺。無論奉行錯謬。卽遵奉力
行而防閑未周。亦足擾累。如應速而遲。則有守候之
苦。應遲而速。則又有逼迫之苦。取結造冊需索生焉。
傳諭問話。詐嚇生焉。卽不耗費銀錢。而廢時失業。民
已苦之。卽不受刑坐罪。而耽驚受怕。民已苦之。本人
之拘繫。此擾累也。無干之株連。亦擾累也。至於官衙
借用物件。雖云給還。而取送無非民力。守候更爲失
時。況未必全還也。買賣物件。雖云給價。而多寡不能
相值。遲早不能如期。況未必給價也。加以簽差出票。
輾轉守催。則酒食使費。更在應付物件之外矣。卽如
州縣因公下鄉。巡歷鄉村。原以爲民。倘或候迎送。或

懷尤自上司察其始

能時時存惟恐擾民累民之心自無擾民累民之事

事鋪設。或備供應。或供馬草。或平道路。均屬擾累。卽或不須伺候。不肯苛求。亦宜不時檢點。以防里甲指派。或自己絲毫不擾。而隨帶人役。亦須防其暗地需索。有一於此。決不姑容。總之州縣乃親民之官。下鄉乃親民之時。非立威之時。止宜拜跪坐立之有禮。不在儀從供帳之可觀。雖無擾民累民之事。須時存惟恐擾民累民之心。周歷一鄉。可使鄉民羣聚樂觀。毋使鄉民愁苦相對。必使民幸其復來。不可使民憂其再至。乃爲美舉。

一曰絕回護官司治事。原宜慎重於先。乃不至翻覆於後。但事理無窮。物情變幻。初時見聞。或依於一偏。或

自己回護者皆保利權
頭實不破則慮失之念
藏於其中代人回護者皆
係中有所不足恐病人之
短而人將揚己之短故也

事多不暇致詳。及至推行不去。已知錯誤。又難拘執。故見惟有及早回頭。據實改正。庶幾理得心安。更見虛懷遠識。卽或有干例議。而改過不吝。事得其平。上可以見上司。下有以對士民。所謂公可服人也。無如官場陋習。樂於見長。不樂於見短。喜順惡逆。明知前此未妥。或以愚民可以計誘。勢迫。或恃才長。可以彌縫。牽合。安心不肯改悔。抵口不肯認錯。前此錯誤。猶云無心之過。後此回護。已成有心之惡。小事回護。必至釀成大案。小過不改。必至積爲大惡。自己喪其本心。地方受其實禍。有時破百姓之身家性命。供爲官者一時之遷就。種種罪孽。無不因回護而起。況此習

國語精義今日尤甚精一
張降清血則雖自爲不納
大局皆此吏治之所以日
廢也

不改不止回護自己也。以小人之腹度君子之心。則
爲經手之上司。回護羅案外無干之人。解局中難解
之結。則爲承辦之同官。回護以莫須有之裝點。加平
民不可解之冤累。則更爲詐賊誣拏之書役。回護方
且恃爲周旋巧計。一時目爲幹辦能員。殊不知

聖明在上。功令森嚴。欺人適以欺己。自作還宜自受。
明干國憲。陰遭天譴。往往而是。善乎諸葛孔明云。
違覆而得中。猶棄敝驕而得珠玉。諸君當熟復此言。
增一分虛公之心。卽少一分回護之念。始而難終而
易。造禍在此。造福亦在此矣。

一曰息忿怒。臨民之官。平心靜氣。猶恐下情難悉。處置

不

失當。一有怒意。堂上官之氣。先不能平。焉能平階下之不平。再加以忿怒。則偏向偏惡。非刑逼辱。何求不得。雖有真冤實情。申訴難人。不但事失其平。破家喪命。皆不可知。迨至事後。氣平。雖知民冤。而獄讞已定。悔亦無及。若夫乘官怒而陰肆其毒。激官怒而倒持其柄。則又胥役慣技。固惟恐官之不忿。不怒也。每見官司遲一時之怒。小民抱終身之冤。官亦造無邊之孽者矣。世俗謂堂上一呼。階下百諾。似居官易於生怒。又若可以怒者。殊不知惟居官獨不可怒。更不敢怒。雖遇可怒可忿之人。尤不忘可哀可矜之念。呂氏云。當官者。先以暴怒爲戒。事有不可當詳處之。必無

不中。若先暴怒。只能自害。豈能害人。此爲篤論。惟時。時懲忿戒怒。如水之止。如衡之平。能息一分忿怒。卽昭一分平允。以此臨民。庶幾無過。

以上各條。各屬不時省察。卽事返觀。所指病痛。有則亟改。無則加勉。明敏者持以小心。遲鈍者勤以補拙。始或有所苦難行之旣久。理得心安。何等樂易。不此之務。縱有長才。不過粉飾於民生何益。於自己何益。自此以後。本院卽此考察各屬之從違。以定賢否。勿作一場話說也。

涂文鈞曰。曲而中。微而臧。如寫家書。如老農道種植法。稱心而談。都忘其爲案牘語也。承祚之稱葛。

侯謂其聲教遺言。皆足經事綜物。可以知其人之
意理。吾於文恭亦云。

仕學一貫錄

陳慶門

古人謂太上化民以德。其次莫如猛。是說也。非謂猛愈
於寬。猛以濟寬。適所以成其寬也。緣民愚無知。彼見上
之寬。則玩心生。後又從而刑之。則怨毒起矣。爲民上者。
視事之初。卽嚴加整飭。吏役士民。苟有過犯。毫不假借。
見之明行之果。人心震動。恪恭各懷。一不敢慢易。不敢
欺蔽之心。如此則呼應旣靈。法在難犯。而處心積慮。卻
時時欲與民休息。事事爲愚頑鑒原。準情度理。足以快
人聽聞。卽盡法處之。身受者不敢怨。若其始不振。後卽

整頓。徒招怨耳。

勤職

汪輝祖

州縣一官。作孽易。造福亦易。天下治權。督撫而下。莫重於牧令。雖藩臬道府。皆弗若也。何者。其權專也。專則一。一則事。事。身親。身親。則見之真。知之確。而勢之緩急。情之重輕。皆思慮可以必周。力行可以不惑。求治之上官。非惟不撓其權。抑且重予以權。牧令之所是。上官不能意爲非。牧令之所非。上官不能意爲是。果盡心奉職。昭昭然造福於民。卽冥冥中受福於天。反是則下民可虐。自作之孽矣。三十餘年來。所見所聞。牧令多矣。其干陽譴陰禍。親於其身。累及嗣子者。率皆獲上腴民之能吏。

而守拙安分。不能造福。亦不肯作孽者。閒亦循格遷官。至於勤政愛民。異於常吏之爲者。皆親見其子孫食祿榮赫當世。天之報施。捷於響應。每一念及。輒爲汗下。吾願居是職者。慎毋忘福孽之見也。造福云者。非曲法求寬之謂。福孽之因。其在於勤怠之分乎。怠之禍人。甚於貪酷。貪酷有跡。著在人口。鬬穴之害。萬難指數。受者痛切肌膚。見者不關疴癢。聞者或且代爲之解曰。官事殷忙。勢不暇及。官遂習爲故常。豈知民以力資生。荒其一日之力。卽窘其一日之生。其造孽已無窮乎。

通論居官

事無鉅細。權操在手。則人爲我用。若習無成見。聽人主

張將用親而親官。用友而友官。用長隨吏役而長隨吏役。無一非官。人人有權。卽人人做官。勢必尾大不掉。官如傀儡。稍加約束。人轉難堪。甚有挾其短長者矣。國人知有穰侯華陽而不知有王。速敗之道也。故曰官須自做。

居官致用

謝金鑾

州縣乃親民之官。爲之者別無要妙。只一親字認得透。做得透。則萬事沛然無所窒礙矣。下鄉之時。不厭其多。必輕騎減從。一食擔茶爐酒榼。行館卽住民居。遇耕民則問晴雨。相慰勞。與談辛苦。察其家口子婦能孝順否。兄弟能友愛否。地有遺利。人有失業否。遇秀才則與語。

讀書行誼入書齋察童子孰聰穎可成就詢所讀書爲正句讀提講解當說則說當勸則勸當罵則罵雜以歡譔戲笑使相浹洽遇食則山蔬脫粟皆可食遇坐則土埂蘆席皆可坐如此所至聞風相率而來遇小事便與立斷不用告狀行之一二年則諸鄉之是非賢不肖皆了然於心目如此者何利不興何弊不除何兇不可緝而又何貧之足患哉

官與紳士親與百姓親則左右之人甚疾之隸役則尤疾之爲官者雖有親民之心往往受制於家丁隸役而不敢行嗚呼何以爲官哉

問衝缺差務之難曰亦自不難要須每事曉得親驗親

發落親身向前則事治若自己全然不知付之於人則非但開銷過半且必至於誤差凡誤差者皆由承辦之人不飽其欲也曰或不盡然曰雖不盡然十居其九只一親字則內外上下諸弊皆絕

與山左屬官書

程含章

州縣之患莫患乎上下隔絕而情意不通情意不通而不思所以通之動曰民刁民蠻而嚴刑峻罰以隨之則愈刁愈蠻不可復治矣且亦思民之刁孰使之刁民之蠻孰使之蠻也哉況乎其未必盡刁且蠻也曾不自反而專以責民夫豈情理之平山東吏治民風之壞其弊正在於此譬之人胷腹脹滿二便不通亦既消之下之

矣而脹滿如故。再以消下之劑投之。則病日愈增。求片刻之安而不得也。惟理其氣而順導之。然後清者升。濁者降。鋼疾霍然愈矣。治民之道。何獨不然。且夫牧令者。親民之官也。官尊民卑。其勢易睽也。吾自不與民親。民誰親之。吾卽欲與民親。民尙疑畏。而不敢親。況乎以情暗倨傲之心。行刻薄貪鄙之事。民有不望風而去。絕塵而奔者哉。必也潔清自守。以服其心。明速決獄。以恤其力。鋤奸伐暴。以去其疾。興養立教。以導其機。而又於聽訟之暇。徵糧之際。講讀

上諭之會。踏勘相驗之時。百姓千百爲羣。環觀列侍。吾乃進而教之。以孝弟忠信之理。睦婣任卹之道。惻惻款

款出於至誠彼民也見官長之實心爲我莫不戴之如父母敬之如神明卽有小不如意之事皆曉然諒其心之無他而豪暴之徒亦將斂跡而不敢逞民氣於焉大順矣子夏曰君子信而後勞其民未信則以爲厲己故吾願諸君子之勤政親民以通上下之情也

答周仲和書

張士元

去年間署涇邑甚勤理事之暇治文書不少忽此誠讀書人本色亦爲政之道當然也昔歐陽永叔爲夷陵令齋中無書可讀乃取積年案牘盈箱堆屋者盡閱之因此得究知人情物理後時深有裨於相業其接引後進亦不多言文章往往與言政事近代王道思晚年亦以

少時居官不畱心事務。但雕琢幾句不唐不漢詩文。深用自悔。觀此則知古人爲學入政之要矣。來書云一行作吏。諸事盡廢。不知所謂廢者何事。豈詞章夙好。今日尙不免技癢。而以不得近筆硯爲憾耶。將亦事上接下之間。掣肘而不得行其意也。承諭漕務經涉。爲累頗深。此第所耳聞目見。非但當局者難幹。卽旁觀者亦難說矣。大約治縣諸事難了。而漕糧爲尤甚。雖然急公愛民。亦視其力之所能爲者爲之而已。竊嘗謂居官之所恃者在廉。其所以能廉者在儉。而今之治縣則又非纖微省嗇所能濟事。蓋左支右絀之情形。時時有焉。然亦當以制節謹度之意推之。期於濟事而止。若事不可濟。則

直可以去矣。開讀後漢書馬援傳。援告梁松寶固曰。爲貴當使可賤。如卿等欲不可復賤。竊歎爲名言。因增一語曰。居富當使可貧。居貧當使可以不富。兄仕宦方始。願常存此心也。

政略

治非一端而已。自始至終。由大而小。必先曾有成模而後可次第從事。不然。措施無準。內外失宜。操刀者傷矣。蓋治原其全體。政略則大用也。

筮仕

潘杓燦

服官有本末。固必先心術而後儀文。然出疆載贄入國問禁。古人總爲行道計耳。倘動止乖離。酬應舛錯。何能

優優敷治乎。故始進不可不慎也。述筮仕。

掣籤已定。則此州縣之事。乃身任之事。必急急諮訪。使到任之日。有成竹於胸。大約以錢糧丁口爲主。知錢糧之輕重。便知地土之肥瘠。知丁口之多寡。便知地方之大小。其應付繁簡。支用奢儉。俱開載賦役全書。各縣全書。俱達戶部。須覓來鈔錄。以備查考。雖本處接役有特來投遞者。然未來當豫計也。查全書

四方之人多聚京師。先須訪尋本處人。諮詢風俗。便知此方應如何料理。不但可以豫先準備。亦可因其所需。以延助理之客。察風俗

新官入境。乃士民觀聽之始。舉動不可不慎。已入境。且

離城擇公廨寺宇居停家屬著吏房開具上任參謁先後起數以便臨時酬答並問上任舊規接人恆禮上任過再令家屬進署入覲

交代印信各處規矩不同有前官先送府庫新官親自見府尊領者有差官吏送至前途者有公座時當堂交送者若府廳掌印必親往衙門領印悉著吏書先具儀注依例而行開印時驗四角篆文并嵌補缺損印文明白模糊驗真封收受印

須知乃爲官要領令各房造冊呈遞務要照款詳開如吏房要造本衙門各房吏幾名書手幾名所屬官吏幾名有無懸缺陞遷署印及治中貢監舉進已經投供候

子月
選者有無丁憂事故未報戶房要造該徵夏稅秋糧若干內中起運若干存留若干各項丁差若干額辦歲課若干雜項錢糧若干及何月日徵收是何月日起解何爲及期何爲過限自我到任以前某項拖欠若干某項完結若干禮房要造應祭壇宇幾所有無先賢祠墓古蹟與忠臣烈士及現在義夫節婦孝子順孫并恬退隱逸向時禮數褒異者幾人鄉宦見任幾人致仕幾人舉人貢監生員若干其接見常規如何境內寺觀若干所僧道若干人兵房要造巡兵若干憑何冊籍查考本衙各衙卓快若干有無重役白役壞事革逐弓兵若干名守何關隘何處巡司地方緊急鋪兵急遞何處地當孔

道何處偏僻空閒驛遞馬匹若干船隻若干作何差遣。刑房要造在監囚犯幾名看監吏卒幾名。欽憲件及本衙門詞訟已結未結從實開具以便完繳。每年須解罪贖若干工房要造歲辦軍需藥械幾何。各衙門公廨及鋪舍橋梁幾所有無倒塌去處應否修理。察院分司椅卓牀凳鋪陳幾件作何置辦。應付本衙工作如何使用。如此造冊講究或有利弊可以興革。看須知到任三日早謁文廟次啟聖祠次兩廡次名宦鄉賢祠畢。升明倫堂抽籤講書列等賞紙筆墨。亦有不升堂講書者。卽往各壇行香并看養濟院就望鄉官或答寅僚

到任後下監取出監簿逐項查點更問有無在外羈候
如有應釋放者即與釋放應保候者即與保候應鎖押者即與鎖押檢其牀褥試其扇鑰巡視周圍牆垣逐一區處看監

既到任三日例須申繳文憑將文憑細加檢點備文申府轉繳藩司其中文要用腳色繳憑

初任之官上下情性未洽非文告曉諭何由通達況立法責嚴於始得民務審於初凡一應應更應守宜行宜禁事件俱要出示以便遵守句語但要明白簡切勿炫詞華發示

為申飭堂規以一遵守事照得本縣授任茲土甫經

下車除一應利弊尙俟漸次飭行外。所有堂規事理。先應列款申飭。爲此示仰書役人等知悉。務照後開條例自愛懷遵。毋得踰越。致干罪戾。須至堂規者。堂規

一每日天明。聽內衙擊點七聲。外發頭梆。各房吏書齊集公所辦事。聽擊點五聲。外發二梆。各房吏書依次伺領簽押。聽擊點三聲。外發三梆。候再擊點三聲。門皂請匙開門。值堂門子并承印書辦進衙。跟隨本縣陞堂。撓越紊亂者究責。

一公堂係法紀之地。自宜清肅。凡遇陞堂理事。皂快站堂把門。不得擅放閒人潛入。卽一應書役。非奉

公務亦不得上堂挨擠窺探混亂違者究責。

一本縣日行牌票該房具稿後填某書承行投入簽套送衙聽候裁奪放行發出膽清字眼務宜端楷。如有潦草洗補者究責。

一凡欽部憲件各房照例承行或應申覆或應申報務宜卽速料理如有玩忽沈閣以致違限不結者究責。

一奉各上司批詞并自理詞訟所應拘提人犯悉以路之遠近定限解審以便結卷歸農如有延緩賄闇者該房與原差一并究責。

一審理詞訟凡拘到人犯務於早堂具單點名照挂

牌聽審如點過人犯該差私行賣放臨審不到者定將該差按名加責補拘另審。

一遇審理事件止用該承一名錄寫口供門子二名站立執簽唱名餘役不許擅上法堂并攙越用刑違者究責。

一本縣六房書辦共置卯簿一扇分填各房姓名以便朔望點名畫卯按簿挨承事理如有點卯不到并卯簿無名攙奪承行者究責。

一凡發出牌票承發書辦總立號簿一扇每吏書三頁前註姓名後列某日承行事件每遇三六九日送衙查銷如有違限不結者俱於午堂比責。

一本縣大門儀門宅門每日輪派阜隸一名常川把守。凡有公務并進見人員各役依次傳報致使閒人逕至宅門窺探者究責。

一本縣係倉庫重地防守宜嚴。一應值宿更夫支更守宿不得怠玩。如有不到并喚閒人替代者究責。示諭把頭門阜隸及鼓樓更夫知悉。每晚起更以後即行封鎖。不許縱放一人出入。其更夫支更務要鐘鼓分明輪更交替。如遇有查點不到違怠熟睡者定行重責。不恕。鼓門告示

示諭把二門阜隸知悉。照得本縣升堂凡一應閒雜人等不許在外圍立擠擁窺探。該班快手在於二門

外伺候聽差。遇有緊要賓客到門。俱令暫止。先行稟知。俟本縣堂事完畢。傳見如應。卽見者。亦俟傳進見。敢有擅自放入。定將值日門役責革不貸。示諭二門

示諭把守宅門。阜役知悉。照得川堂逼近內衙。止許門子二名在外聽候呼喚。如各吏書遇有急緊公文。稿案。許擊梆從轉斗內投進。稟請簿籍文卷。俱要寫具稟單。以憑查發。不許口請。務要高聲傳話。不許低言細語。事完卽出。其餘人役。不許站立後堂竊聽。至於非係衙役。更不許放入一人。如違。把門人役重責革役。宅門告示

爲曉禁事。照得本縣衙門。乃錢穀刑名所繫。例應關

防置立轉斗。凡封門之後。一切文書公務。俱從此傳稟。實爲出納之咽喉。杜私之關鍵也。豈容閒人擾混。除司斗一人之外。敢有近前窺探者。定加研究。弊露重處。如司斗之人遠離。致有疎漏。亦卽加責。逐換斷不少假。轉斗告示

爲嚴防倉庫事。照得倉庫乃錢糧重地。看守宜嚴。若混雜疎忽。大干法紀。合行禁約。爲此示諭承管倉庫吏書庫夫知悉。嗣後每日止許承管吏書在內聽候呼喚。不許縱放一應閒雜人等進出。遇晚務要吏書庫役親身上宿。不許僱倩匪人頂替。如違重懲。倉庫告示爲申嚴監獄事。照得囹圄重地。干係匪輕。提牢官吏

每日清晨督率禁卒打掃潔淨毋使穢氣蒸人致起
疾疫如遇犯人有病卽刻稟報撥醫調治犯人家屬
往來盤問的確方許見面至於一切違禁之物不許
混藏入內尤不許凌虐犯人索詐送飯犯屬至晚因
其罪之輕重枷鎖牢固不得疎虞務要內外巡邏梆
鑼響亮不許酗酒熟睡偷安誤事敢有查點不到及
僱替應役者定行重責

監獄
告示

爲申嚴門禁事照得城垣重地門禁宜嚴啓閉自有
定時盤詰更宜加密理合出示嚴飭爲此示仰把門
兵役人等知悉嗣後日則盤詰往來如有面生可疑
之人禁止入城至於身藏軍器務必盤問來歷若係

來歷不明送縣訊究。夜則依時鎖閉支更人役務要
梆鑼響亮鐘鼓分明。週城巡查按更輪流交替不許
片刻懈怠偷安。務使盜賊肅清士民安枕。敢有故違
定依法重處不饒。城門告示
一應事務俱宜立簿填記以備稽考。其錢穀刑名已有
必需簿冊各分著外。今將日行宜備者臚出如左。大
約挨次登填不必另立式樣。立簿

上司號件簿

應付牌票簿

買辦簿

買辦底簿

書吏畫卯簿

皂快畫卯簿

承發投書簿

著回書日書啓底簿。將書啓按月日填錄

並取白綿紙方簿二十扇以備內衙逐日填記事務

之用。

到任以後親友漸有抽豐之意。在至親密友偶一至焉。自當周旋贈貽以盡敦睦之意。若一面之交認爲莫逆。懸遠之戚。冒爲至親。孫支雲派何能徧買歡欣。況有好事之流。托空之輩。一入境中。聲言邑長向日感恩。州主平時受惠。竭力招搖。大喪體面。上司有聞。敗名僨事。使實有其人。始行屏絕。反多形跡。不若於到任之初。出示豫防。猶可於解任之後。冀相永好。辭禁遊客到任之後。取本治志書一部。翻閱詳明。如山川險阻。人烟疎密。村鎮大小。橋梁修廢。某處當防盜賊。某處當防水潦。某地爲衝腴。某方爲僻瘠。按志循求。瞭如指掌。既

於勾攝徵輸限期可定而興利除害亦次第易行矣。志

記

親管上司宜速請見斷不可惜費遠巡蓋一官初至在上司亦欲觀其才品苟或愆期不怒其怠慢則疑其猥懦矣相見儀注著禮房開送依例遵行舉止應對務必舒徐周到敬慎大雅傲詔俱非所宜嗣後不時相見應將錢糧刑獄以及緊要之事開一小帖攜帶觀覽以便

陳白答問。參調

印信關係甚重每日封印須親驗固封開封亦驗每日簽押俱必內衙親丁用印即使該吏用印不得隔遠用時必報坐印鈐印數目用畢卽呈看以防盜欺須置一

牌牌入印出。印入牌出。鎖匙常須親帶在內。必須密藏。毋爲家人透漏。宜置之便處。以備不虞。遠出須帶印隨身。以便急用。嚴印信

轉斗最宜防檢。宅門關鎖封記。嚴禁閒人出入。雖應出入之人。亦用關防。管斗之人。不許出外交接。每日簽套進出。止許數查數目。不許檢看問答。以絕交通。三五日一輪。不可久任。滋弊。換不拘時。更妙。嚴轉斗

有司所以取重上官。見畏吏書者。皆在文移。務求詳確。明白。不拘大事小事。稿須斟酌。紙必堅厚。字必端楷。封必完固。方快觀瞻。若專委吏書。漫不經目。使得改甲爲乙。移重作輕。上司看破。卽以庸常待之矣。一應來文須

親手開拆。先看封面上開件數。及封內文移年月硃語。應畱看者。畱看應發房者。發房俱將硃語略節登記簿籍。有機密重情。卽袖進內衙待計。定後發行。慎毋輕泄。以致敗事。其發行文書。當命該吏對面點封。以防夾帶。改寫情弊。緊要文書。或密差。或親齎。以防停閣。開拆之患。凡一應文移。欲申發者。俱先立案判行之後。然後以合用文移寫行。以便查考。重文移

簽押之際。吏書倚以爲奸。最宜防範。逐日六房各將應行事件。先日送案內衙斟酌。放行次日寫清送簽。挨次開簿。牌票有不上簽簿者。此欲私自抽去。暗行暗止者也。卽令回話。簽押時。須將原行文移原案查對一頓放。

行。不可非時亂發。既發之後。雖有公文。俱不簽押用印。

謹簽

押

公事幹辦。全在查比。猾胥作弊。利在牽延。故一應公文。牌票俱要嚴限日期。及時銷繳。將合縣里分分爲三等。離城三十里限次日。六十里限三日。九十里限四日。寫貼書案兩傍。量地遠近。限期遲速。立簿按期比較。分別勤惰。勸懲亦要責成。該吏方有統領。其廢牌塗抹存衙。以便查考。然一事止出一牌。催則內開小票。止拏原差。不必改牌另差。致生騷擾。

考銷繳

居官寡過錄

胡衍虞

得缺後。或有使費。不可向部民在京商買者。假借蓋

有借貸。則彼於我有相挾之心。我卽於彼有相感之心。後到任所。彼或要說人情。要贏告狀。不從。則彼必以我爲忘恩。從之。則我且爲彼而枉法。故甯可省費。不可喪體。至彼或有禮物餽送。更絲毫不可受也。勿向部民借貸

新官初到。一切人役來接。眾目攢視。一官視其所喜者何在。後卽思所以承順之。視其所惡者何在。後卽思所以掩飾之。視其所疑者何在。後卽思所以惑亂之。視其所畏者何在。後卽思所以恐動之。此時凡百舉動。不可不慎。而其要尤在於少說話。凡接官有一定地界。或有逞其裘馬。昇盒攜樽。遠迎數十里之外者。雖一時熱情。不可卻絕。恐此輩卽是縣中好事之人。須防後日纏

擾官府亦不可多假詞色。使其回縣誇口說新官與我一見如故。借此耀勢凌人。若在本分之地相接者。除屬下鄉民不必下轎。但以溫語勞歸外。凡同僚儒學紳衿。皆宜下轎敘謝遠勞。若妄自尊大。乘轎從紳士面前長驅而過。彼口雖不言。心必不悅。地方官豈可一入境而遂使人不悅乎。待來接者

上任先一日至城隍廟齋宿。務竭誠敬。不會客。不飲酒。次早行祭。其祭文不可鈔寫寬泛舊套。必出己真心實實。以不敢枉法。不敢貪財。對神矢誓。自此以後。倘有欲苟且處。即想起對城隍發誓時。私心便止。上任儀衛只照常規。不必分外多張旗旆鼓樂伺候。人役偶有

失誤此日未可遽行杖責。即有大觸犯我者。且忍一日。以養和植福。宿廟

上任有鄉士夫同僚佐貳具禮。一概不可受。蓋此時見禮。即受人。必視我爲貪夫。後將思所以餌我矣。自此以後。接見紳士。不可延入內堂。只在賓館或川堂相會。使吏書門役環侍左右。彼見眾人屬目。必不便開口說情。則我既不相絕。以開罪。又不相昵。以徇私。此亦善絕請託之一法也。交際

上任三日。早謁文廟。不可循常套。一拜即出。須逐一閱視。殿宇門扇神龕牌位。損壞與否。潔淨與否。如有缺略。即諭整飭。俟下次行香再閱。倘仍違玩。定責廟守。次閱

啓聖祠。次閱兩廡。次閱名宦鄉賢祠。既畢。升明倫堂。講書行賞。然後起而與諸生約曰。自今伊始。不佞固要以禮相待。諸兄亦要以法自守。毋違臥碑。毋擅入公門。自取薄待。相與有成。乃見自愛。視學

官當新任。於覺獨之人。未必遂能念及。然新官眼中無此輩。此輩心中。有新官時。時望其賑恤。念念欲其救拔。故到任後。須要看養濟院。問其月糧。有人侵剋否。病者得藥否。死者得棺否。檢點在心。使其得所。看監亦然。看養濟院

每日簽押文書。應遞上司。詳驗公文。必須擇小心吏書。專管對讀明白。一字無差。方許用印。不可任其差錯。潦

草致上司批駁。若初任簽押尤宜謹慎。有吏書人役侵用銀兩。假作前官支用。補卷補領者。有事情難處。前官不敢主張。乘機申繳者。諸如此類。不可勝數。須先示諭。凡一應簽押用印公文。俱以本職到任之日爲始。從前一切俱不許朦朧稟印。其應簽押用印公文。須於先一日送衙查驗。如有作弊情由。重責治罪。簽押

新官蒞境。投遞紅稟。紅呈最易弊混。宜於未到之先。出示曉禁。除命盜各案。准其接印後。以紅稟隨時具控外。其餘舊案及一切詞訟。統候三日內考定代書。示期放告。違者概不收閱。同紅示發貼照牆。履任次日。收考代書。頒發狀式。其狀面飭令分別做狀人歇家字樣。面諭

代書務於兩項下確詢姓名填註。如狀係自做亦據實聲明。總不得以自來稿三字混飾。倘敢漏填及抹匿前案不錄全批者。卽提代書重責。並出硃諭曉示。凡依口代寫呈詞。原無干例禁。告狀投宿亦屬情理之常。決不因填註有名從而查究。惟所遞呈狀語涉妄誕牽連。則訟棍必多唆使。所審案件結後刁翻抗斷。則歇家必爲把持。定當按名嚴拏究辦。如做狀姓名係具呈人捏報。卽令著交等語。示貼於代書公所。故告從王鳳生從政錄中錄出附此

候補

何士祁

候補宜隨在畱心。逢人諮訪。省會聞見較廣。要在能自得師。勿亟亟於署事補缺。正以候補之久爲能立定腳

跟也。

宜練書公事

首府卽候補州縣之上官。首縣則通省領袖。其人非德量渾厚。必材識超拔。或熟諳公事。或練達人情。苟有一長。卽宜請教。幫審案牘。尤爲分之所宜。

請教首府首縣

苟有餘暇。卽宜讀書。先看省志。庶幾全局在胸。事有把握。勿以紙上空談忽之。至律義精密。例文繁雜。非潛心根究。終難貫通。能加一二年工夫。則公事到手。先有成竹。不特刁徒不能把持。奸胥有所忌憚。卽幕友亦必分外畱心。受用正未可量也。若不能全部通貫。則名例田宅婚姻錢債盜賊人命鬪毆訴訟詐僞犯姦雜犯斷獄誣告諸條。必宜參究。

省志律例不可不讀

十室有忠信。三人有我師。況省垣爲人才薈萃之地。仕途爲人才爭赴之場。我果先施。必能獲益。尹文端公所謂虛心何患。同心少。眞閱歷語也。同寅宜虛衷諮訪

唐以九品用人。宋以十科取士。同力共濟。何地無才。科甲進士。高自位置。他途進者。依阿從人。此兩失也。要之讀書人。未必皆成才。不讀書人。未必皆棄才。愛眾親仁。取長舍短。有志之士。自責之不暇。又何同異之有。不可黨同

伐異

言語隨地宜謹默。何獨官廨。而官廨尤爲眾屬耳目之地。放言高論。最易犯。最宜謹。所言不當。不但爲識者所鄙。且足取怨招尤。卽言之當。而忌者環集矣。官廨言語尤宜謹默

於老成同官處虛心求訪賢友。再加以真知灼見。必有
所得。若紛紛推薦者。終難盡信。幕友須平
時延訪

薦長隨者極多。不妨從寬收錄。先立一簿。書明薦主何
人。並詳記其住址家屬年貌。擇其老實穩練者。寓中隨
時試用。如有過則遣庶幾多中選擇。或得指臂之助。然
終不可假以事權。是在駕馭有方也。長隨宜隨
時體察

隨同讞獄候補之分。至於面稟上司。斟酌輕重。則自有
主之者。越俎代謀。既屬非分。且恐先入爲主。後難更移。
尤不可不慎也。案未訊定不
可先稟上司

對本收呈詞。侍香班上衙門。乃候補分內之責。雖無與
於公事。而有關於體統。若鄙夷不屑。便失之矣。且奔走

習勞終勝於閒居無事也。至若代閱課文更須精細筆

下刻薄尤屬非宜。

衛參隨習不可厭煩

差遣委用有事爲榮。上司每以此考核人材。所以爲試用也。尋常事件固宜誠實。至於查辦災賑訪拏命盜案件尤須於誠實之中加以謹密。或不解事不妨商之首

府首縣及老成同寅。

遇有差委奉行宜謹

候補官無所進益。今日多一分糜費。卽來日多一分虧累。凡事爭入手節儉爲尤急。

萬中慶用務從節儉

今日候補所用之人卽將來得缺所用之人須先示以準則約以法度。卽不可過從苛刻亦不宜稍有縱弛。安靜整肅庶爲得之。其要在自治始。

萬中要整肅安靜

信友爲治民獲上之本。則擇交宜慎。非聲氣結納之謂也。擇其識見高明。公事練達者。先施之以收其益。至緩急足恃之人。每多惻怛無華。語言質直。尤宜敬事。虛受。擇交不可不慎。

候補無地方之責。而辦地方之事。本處紳士不能絕其往來。則形跡之間。煞宜留意。言語尤須縝密。并用人亦須防範爲宜。嫌疑不避

上司公文。或會同印官申復。或單銜申復。固已至於往來信札。每懶作答。此亦因循之漸。不可啓也。抽毫命紙。頃刻工夫。迢遞雲山。商量几席。奈何并此而廢之也。若得缺後。宜將平日交好。應通信札之處。分別親族年世。

各誼開列一冊。詳註其家屬名號。行第。存書啓幕中。庶不至於舛錯。稿宜手改。謄真之後。亦須過目。以防訛誤。
通行信札
必須詳慎

之是

游嬉徵逐。日糜萬錢。奢侈漸開。人亦困於酒食。友朋來往。清茶一杯。儘足以助談興。好友投契。不在燕會。燕會宜省來而不往。是爲失禮。客來而以他辭拒之。尤失禮之甚者。況與人晉接。可以廣聞見。長才識。獲益更不淺也。豫戒聞人。勿蹈習俗。客宜月拜客來宜相見

至親的屬。女眷自應往來。若恆泛交情。胡爲僕僕。不但花費。且滋口實。卽僕婦亦可不必要也。女眷不宜往來內言出閫。多由本地女僕。候補固不可用。得缺後更宜

切戒

不可用本地女僕

寓居與家無二。一切任用僕輩。則事事廢弛。求整肅也難矣。有眷屬者。責有攸歸。無眷屬者。分宜親理。寓中事宜凡言州縣書罕有言及候補者。似此各條亦可補他書之不及。而其扼要總在讀書讀律與賢爲友。則受益自無窮盡。遊嬉奢侈最宜切戒。

補缺

投紅諭得缺第一事也。雖無關於宏旨。而所用非人。則招搖鋪張。均所不免。入手先左矣。以老成謹默者爲宜。投紅諭宜用老成人

動用器具不能攜帶。勢須借資書差。書差焉能賠貼。仍

出之於民力能省一分則民受一分之惠彼書差亦無所藉口矣不妨明諭經辦之人或以圖記爲憑或以字條爲據所借物件必稟明於官庶幾幕友家丁不致十分挑剔至於下馬飯等俗例一概從刪書差供應務令節省有向來官捐之款如工食油火諸項查核支領憑據勢所不能省者宜率由舊章以免咨怨其有冒銷者查明革除應出之款不可吝惜

點卯前三日諭吏兵二房凡書役入卯者屆期親身聽點務令於簿內註明某縣某都某圖人家有父母妻子皆註名字年歲面貌必詳細註入點卯時誌之可免正身避匿之弊書役卯簿宜註明年貌住址家屬

錢漕版串必由內幕查核批解迴照必須弔驗大小交款必根查舊卷倉穀必須盤量此不能稍爲寬假者也。至於攤捐各款有案可稽者不妨照案接收。交代宜嚴核寬接官爲一縣之主凡起居動靜伺察者多不可不慎也。冬春辰初夏秋卯初必發二梆然後至簽押房閱視上日所送片稿及批詞公文稟信稿件飯後看審案卷籍未刻發二梆審理堂事晚則查核帳簿標記刑名錢穀簿查看門簿或無堂事則與幕友酌商地方事宜或考訂律例或檢閱史傳或赴市廛村野以察民風至朔望拈香必宜早起期會出入必有定時與民約者尤在必信習以爲常歷久不怠則內外人等皆知官之所專心者

在於公事而諸務就理矣。刻刻振作。猶恐有失。或以才
餘於事。以簡缺爲不足爲。吾知其廢弛者多矣。期會起居宜定

到任

何耿繩

一到任接收庫項。照前任移交存庫銀錢及贓罰雜款
冊簿。親帶該房逐細查檢。如有不符。惟該房是問。
一飭該房查開前任在任若干年月。每年應徵地丁正
耗暨各項銀各若干兩。除已徵若干兩。餘卽民欠實
數。再查歷年經徵銀各若干兩。除各本年坐支應扣
若干兩。如壇廟祭祀廉俸各役工食驛馬草料之類俱在錢糧耗羨項下坐支。已批解
司庫銀若干兩。現存儲庫銀若干兩。餘卽官虧實數。

查明卽飭該房具結開明某任實在並無虧短或實在虧短某某項銀若干兩如有隱漏情願認賠甘結畫押存內雜稅項下亦照此辦理

一飭該房查開本縣應存倉穀若干石除某任某年奉文某項支發若干石某任某年報明買補若干石仍應存倉若干石除現存若干石餘卽官虧實數如某任報買未買現存穀價在庫亦可作抵查明確數卽飭該房具結開明某任實在並無虧短或實在虧短倉穀若干石如有隱漏情願認賠甘結畫押存內

一通飭各房查開經管院司道府各衙門按年按季按月應攤捐某項銀若干兩每年共應攤捐銀若干兩

某任某年已解銀若干兩。查明確數。卽飭該管各房公具某任內實在欠解攤捐銀兩逐款開明。共若干兩。如有隱漏情願認賠甘結。畫押存內。

一、飭各房將每年某衙門某項應攤捐銀兩逐細開單。如某項每年應攤銀三百六十兩。則每季應攤九十兩。每月應攤三十兩。每日應攤銀一兩之類。並將每年共應攤捐銀若干兩。亦按每季月日分析開明。如每年統共應攤捐銀一千二百兩。則每季三百兩。每月一百兩。日三兩。三錢。三分之類。在任若干月日應攤若干。舉口可稽。無須卸事後查款核算。致淆亂不清。

一、飭該房查開本縣每年應徵地糧正耗銀兩若干。向

例或收銀、或收錢、或銀錢兩便。如三錢以上收銀、三錢以下收錢之類。如係收錢每兩正耗共收大錢若干、所有傾鎔火價、添平解費、統共若干、按市價扣足銀價、是否敷解、俱令逐細開出、以憑核對。

一、飭各房查開移交監禁人犯若干名、捕班看管賊犯若干名、各班外保候訊人證若干名、每人名下開明案由、親臨點查、如有私押、私放、即將該管吏役重責示警、監犯中如有有案未報、及已報未經招解者、查明限期寬緊次第審擬報解、至賊犯有案情輕微而凍餓不堪者、勿令在押待斃、宜速傳親屬地方保領管束、或係鄰封關到者、備文遞回取保、至外押人犯

有案關重大者仍押令候訊其無關緊要者卽傳案訊釋或一時不能傳集則取具連環的保候傳緣無辜被押本應矜憐況因暴病或他故致斃或另滋事端尤多不便此三處須派親信妥人每晚按簿查點勿令人數多寡不符

一到任或衙署或公館白大門以內前後俱要親身查看如有便門缺口務須堵塞臨街矮牆務須築高非以防外之入所以防內之出也司關者須老成壓眾之人官給門房諭帖凡署內家人非官差不許任意出入如有阻之不聽者回明逐出司關者聽情不阻查出併究卽官親幕友出門拜客亦須問明稟知蓋

衙署隨處有弊。無內應則不行。卽茶房門子。非坐堂會客。不可令入宅門。緣書差往往以茶房爲耳目。官幕之一言一動。外人無不周知。撞騙招搖。多由於此。不可不慎擇而嚴防之也。

嘗試語

王 植

移孝作忠。事君猶父。位祿尊榮。皆君賜也。時懷不敢負君之意。則清慎勤三言俱在其中矣。雍正二年奉頒訓飭州縣。

上諭六百餘言。以州縣爲官之基址。勉以潔己奉公。實心盡職。自當於正廳置高龕。製香木黃匣奉之。另騰副本不時恭閱。士子入官。固當以此爲先也。忠君

凡在一邑。必以潔己愛民實心辦事八字爲根柢。所有
邑中當卽革之陋弊。當敬禮之賢紳士。或積頑之衙蠹
豪棍。或未省之冤獄。一到任後。卽核酌舉行。方足示維
新而慰人望。然必加詳慎。若妄行一事。或尊禮非其人。
或責處非其罪。將物議騰沸。反不如安常循舊之無大
失矣。徐而爲之。卒行其志。事雖易而道則同。立政

朱式璟曰。徐而爲之。是老成閱歷之言。

按縣令皆署曰知某縣事。夫縣令何事。民事卽其事。民
之黠者爲胥役。或藐法以蠹民。或舞文以欺官。所以約
束之者。有事民之秀者在學校。何以正品術。何以倡風
化。所以鼓勵之者。有事民之愚者爲鄉役里氓。凡勤儉

之道。禮俗之節。作奸犯科之誡。所以曉示之者。有事由是相其地之所宜。而爲之興利除弊。於案牘則速理之。於刑獄則愼恤之。於賭娼則嚴禁之。於倉庾則時省之。於禱祀則敬將之。於潛修芳潔之士。則優禮之。於急公樂善之家。則獎勸之。於城垣祠宇橋梁津渡之屬。則修葺之。總期以民事爲己事。否則非能盡事之實者也。又按知縣之知其義爲主。然旣曰知某縣事。則一縣之事。皆所宜知。而縣者鄉之積。鄉者人之聚。計一邑中爲鄉幾何。一鄉中爲戶幾何。其中紳衿若而人。胥役若而人。世家大族爲誰。客商旅寓爲誰。畸零附戶爲誰。耆老七十以上。嫠婦十年以外爲誰。市肆何日。廟觀何所。水渠

河津橋道何處因其俗之所敝而爲之撫字教誨勸農示儉以厚其生敬老表節以惇其俗旌善別惡以起其恥興學課士以養其才實行保甲以辨其類慎選鄉保遴舉族長以平其爭總期以己心求民心否則非能副知之名者也余蒞任二東皆本此意初至卽彙縣志及各房須知冊自爲簡明簿大略分刑名錢穀簽差三項其刑名先列欽部大案起發限滿月日監倉人犯姓名事由及捕役所分地方積竊蠹棍名籍各枷斤兩所枷人犯月日并奉批詞訟皆附於後錢穀先列額徵正賦若干內應解應支各款若干雜賦若干本色米若干各列原款支款而上司官衙同城職弁屬員履歷紳衿

姓名胥役練保鄉村圖甲并齋祭日期皆附於後另爲
 差簿人占一幅所准發差事件各注於名後辦竣審結
 者隨手註銷未完者酌期查比時時檢查升堂公出皆
 攜之內號所登各房所承我已握其綱要矣嘗由和平
 赴海豐方在途次值本府專差立催和邑倉穀款項清
 數又查監犯姓名事由從吏皆張皇束手余出所記錄
 俾繕覆之或以爲太勞余曰一勞正所以久逸也但不
 惜手勤眼勤耳邑事

凡當官有宜知者四告諭紛然徒以炫目所行條示久
 而自忘籤不過宿久漸不行是曰虛冗章程不立鮮所
 遵守因循舊事無所振作政事叢脞憚於更易是曰葺

下
情上下號件宜刻截記。或爲要件。依限覆結。或爲最要。刻日申覆。接到之始。分別截印。覆訖結訖。又截印記。如有遲違。立即催辦。餘所行知。多不用覆。另又截記。不時親閱。否則遺忘。是曰昏蒙。更有綱要置一手摺。前所未結。本日應行上件。宜覆差催未到。人犯應釋。隨手登摺。逐日檢點。此我白爲。非人所代。於此不能。是曰玩忽。此四警者。余歷九縣三州二十五年中。所自得之要領也。

四警

勤職

汪輝祖

官之一身。實叢百務。精神稍不周到。卽開左右竢伺之機。官設粉版一方。將應辦事件。隨手登記。辦一條抹一

條自無遺忘之患。事須謹慎者。或密書手摺誌之。總不必陽誦精明。授人罅隙。然此謂意中經畫之事。若日行常件。宜各立一簿。時時檢閱。具列於左。

一、稽獄囚簿。記獄囚事由及收禁年月。其待鞠而暫禁者。尤須加意。應禁應釋。隨時可辦。

一、查管押簿。管押之名。律所不著。乃萬不得已而用之。隨押隨記。大概賊盜之待質者最多。審定則重者禁。輕者保。無干者省釋。立予銷除。命案牽連。應卽時詰正。取保勢不能速結者。至四五日斷不可不爲完結。若詞訟案件。自可保候覆訊。不宜差押。蓋管押之干係甚重。或賊押而捕縱行竊。或命押而懼累輕生。至

訟案押而招搖撞騙百弊錯出此外尚有班房夜間
官須親驗以防賄縱數年前禁革班房名目令原差
押帶私家更難稽察似不如仍押公所爲妥又役之
貪狡者命案訟案及非正盜正賊藉論押以恣勒索
每繫諸穢污不堪之處暑令薰蒸寒令凍餓至保釋
而病死者不少故非萬不得已者斷不可押既押須
親自查驗不設此簿或有遺忘勢且經旬累月民受
大害矣

憲批簿記上官批發詞訟奉批月日及易結難結之
故余向幕劇邑凡到館之初卽飭承彙記此簿置之
案頭日弔卷查閱或須審結或可詳銷自爲註記其

原稿牽連多人可以摘除者一一註明核稿時俱行刪去遇有訟師指告經承弊改舊稿即可明白批示上官提催亦不難將應急應緩緣由據實詳覆以免差擾次第辦結不使吏役操權

一理訟簿記兩造之住址遠近及鄰證姓名邑雖健訟初到時詞多然應准新詞每日總不過十紙餘皆訴詞催詞而已有准必審審不改期則催者少而誑者懼不久而新詞亦減矣手自註記日不過數行何至於勞幕中爲之已有明效官則受詞時可以當堂駁還新詞斷不能多何憚於記故欲求無事先在省事此試之歷驗者也放告須在日中可以從容閱訊令

代書旁伺情節不符。即可根問。立究訟師不致被誣者。受累安民之道。莫善於此。斷不可委佐貳收詞。

一堂籤簿。事非急切。斷不可當堂籤提。役齋堂籤。甚於狼虎。往往人未到官。資已全罄。余里居見此破人家者多矣。萬一發籤。須當日訊結。若遷延一日。卽民受一日之累。如路遠人多。須至兩三日者。立簿登記。恐事冗偶忘。則役操其柄。所關非細。其籤必須蓋印。發行其他硃單。硃諭。與堂籤一例。皆須蓋印。登號以防詐僞指撞之弊。

一堂事簿。卽值堂書登記所理之事也。凡讞斷顛末。及諭辦公務。勾攝保羈。如不逐日摘敘。一有遺忘。則吏

役蒙混百弊叢生。故必於堂事完竣之時。取簿覽察。過硃。攜置案頭。隨時檢閱。可與內號參考互稽。叢脞之虞。庶幾可免矣。

以上六條。皆閱歷有得之言。非紙上空談可比。凡爲牧令者。宜書一通置之座右。

越中從政錄

王鳳生

操守爲居官根本。長隨書役。未有不覬本官之苞苴。以分肥者。始或藉無礙者以相嘗。後則雖有礙者。亦伺吾隙以相制。若於其事之可取不可取。尙待猶豫。是僅有利害之見存。而非可以語品行也。且此中區別。在我雖存。界限在人。豈盡周知。徒滋影射招搖。爲人中飽。迨欲

物令書華要一

笑

翻、然、改、轍、而、一、行、敗、則、百、行、可、疑、何、以、示、民、之、信、故、慧、劍、立、斷、須、定、自、始、基、操守慎始

作吏管見

朱

古人左圖右史乃為實學。居官亦然。縣境山川村落道路遠近必繪一圖。至於村莊之大小煙戶之多少圖所不能載非冊不明。宜將境內幾鄉幾里每里所轄某某村煙戶若干內有衿士書役保甲之姓氏棍徒案匪之名號逐一造入以鄉統里以里統村并註明離城水陸幾里有市集馬頭及駐文武汛官官倉社穀一一註明其應徵錢糧不能逐戶逐村止於某里下註明總數凡圖難繪者列之於冊冊未明者考之於圖遇有水旱災

景
荒賑糶搬運米穀。可以按冊而稽。按圖而定。奉文查拏。要犯奸宄。亦有方所。不至通縣票差。四出驚擾矣。平時費此心。思考訂明。白彙造簡明一冊。臨時易於措置。事半功倍。但不可視為尋常案冊。聽書吏查造。自己全不經心耳。

州縣官職在親民。境地寬廣。人民散處。官住衙門。除審事比較外。不能與民相見。焉能與民相親。甚有審事則惟了結本案。比較則惟按欠責比。何曾有一語教訓鄉民。屢奉

上諭訓飭。州縣巡歷鄉村。所以盡親民之職守。行親民之實政也。凡踏勘田山。相驗人命。所到之處。不妨停驂。

稍坐招集士民耆老諮詢慰問僻地不常經過者不妨迂道一行到任數月半載之後必須處處皆到處處之民皆得與官長相見聽話乃不負巡歷之行克盡親民之職常見有在任數年而足跡未歷四境者名曰親民實同遙制如此那有善政善教至於縣官下鄉經過之處士民環相觀看婦女兒童羣來識認官在輿中還宜返躬自問若輩如此心中畏我乎愛我乎抑銜怨於我乎指罵於我乎或心中有何利當興何弊當除望我爲之經理乎我果能爲之經理一二於民不虛此望乎於我不負此行乎不然與迎會出遊之神佛泥塑木雕到處受人香燈拜跪耳目全無聞見者何異乎至於沿途

所帶書役家人。必須輕減。所需夫馬住宿上下飲食。一
一籌定。嚴禁鄉保藉端指派。書役暗地需索。於鄉保毫
無擾累。俾鄉民羣聚樂觀。毋使愁苦相對。使鄉民望其
復來。毋使憂其再至。方不愧親民之父母。願州縣官巡
歷公出時。切爲警省也。

先訂冊。後巡歷。事事畱心。步步踏實。洵不愧一知
縣知字。

諮詢地方利弊諭

陳宏謀

各方之風氣不齊。小民之苦樂不一。欲與聚而惡勿施。
官司之職守也。修其教而齊其政。治理之權衡也。本都
院荷蒙 簡命巡撫陝西。通省之吏治民生。人心風俗。

竊欲與督部堂隨時體察商榷施行。顧欲事興釐必資采訪。而幅員廣闊。耳目難周。案牘所呈。僅得梗概。屬官面詢。挂漏尤多。欲逐件行查。又不勝其繁瑣。今彙開條款。專札走詢。該府速卽轉諭各州縣。逐一登答。所有各條開列於後。

一、民地如何起科。屯田如何起科。徵收地丁。加耗若干。每畝或銀若干。或錢若干。或銀錢兼收。票錢若干。作何分別。是否自封投櫃存畱若干。解司若干。解司者係元寶。抑係散碎。數各若干。傾銷火工。每兩若干。解費若干。如何分辨。有無寄莊包收。抗欠等事。或歲內全完。或奏前全完。其有不能完者。係何緣故。作何設

法方能全完。

一催徵糧米加耗若干。票錢若干。或米或麥或豆或草。或本色或折色。或就近納縣。或赴糧道輸納。每年有無一定數目。徵糧雜費如何釐定。

一常平倉穀原儲若干。麥若干。近年捐監若干。有無存價未買。每年補倉。是否必須采買。采買何者爲宜。每年出易幾分。是借是糶。其糶者或糶穀或糶米。或在城或在鄉。借者作何散給。作何著落。還倉有無負欠。一社倉穀若干分儲幾處。有無倉櫃。何否。年年出借生息。小民實在得益願借否。社長副得人否。有無虛出領借。或借此營利及侵蝕之事。每戶借穀多至若干。

少至若干有無負欠不還之弊有無好義紳衿樂輸增儲。

一落地稅。取稅大約何項貨物作何徵收。定額若干。
一境內地土種春麥者幾分。種秋禾者幾分。或種糜米
菜豆。有無水田各項種植。何時佈種。何時收穫。計本
境所獲。可否足供本境之食。或販運何處。米糧價值
每年至賤若干。至貴若干。區田畝否。試行有無成效。
除米麥豆而外。地方出產何物。以資民用。小民三時
耕鑿而外。作何營生。有無出外流移之民。栽種棉花
否。能織布否。曾試種桑蠶否。能織紬紗否。畜牧之
利若何。有無栽種煙葉。係何項田畝。多寡若何。

一境內河道幾條。某河自某處發源。流於某處。可否通舟於何起止。或常年可以行舟。或每年幾時可通。何項船隻。

一境內山坡嶺側。有無可墾之土。報墾者作何認墾。如何查勘給照。以杜隱佔爭奪。作何分別免科。以鼓舞開墾。買賣田產。有無告找告贖之事。以何爲斷。將何立法。以清弊端。

一境內高阜山田。約十分之幾。係幾何都里。傍水近河。田約十分之幾。係幾何都里。低窪者或築壩以資灌溉。或築圩以衛田廬。高阜者或開塘疏渠以資灌溉。或砌礮礮以防沖決。歷年有無山水沖壓之事。境內

有應行開修之水利否。井泉多寡如何。是否可供灌漑。欲鑿新井。須費若干。易於興舉否。

一鄉飲如何。核實舉報舉行。三年實興之禮。曾否舉行。孝子義夫節婦。如何舉報。每年有無多寡。境內有無懷才抱德之士。有無名人著述。有關經濟理學之書。尋覓送閱。其風雲月露者。不必該處。現在崇祀鄉賢名宦何人。另列一冊附送。現在有無能文潛修之士。能悉其姓名否。

一文廟。是否完整。或在城內。或在城外。祭器樂器。曾否齊備。有無修學公山。每年如何修理。

一境內有無古先帝王聖賢祠宇墳墓。曾否修理。如何

照管春秋二季如何祭祀

一境內士習如何。生監好訟多寡如何。鄉紳內大者某家小者某家。或現任。或原任。或在城。或居鄉。

一士子讀書勤惰如何。文風如何。府縣考期童生若干。應鄉試之生員若干。中式多寡。會試有無。中式境內有無。舊設書院義學。現在館師何人。生童若干。有無公租經費。以充脩脯膏火。

一境內風俗勤惰如何。強弱如何。婚喪豐儉禮儀如何。有無結黨持械對敵打降打婦搶親姦拐出嫁生妻等惡習。

一每年真正命案若干。有無緝兇未獲之案。自盡命案。

多寡若何。官司驗明。可否卽爲完結。有無屍親抄搶挾詐之事。

一該屬有無盜案。并已經發覺。尙未獲盜之事。竊盜多少若干。已經獲賊。尙未審結若干。未獲者。現在如何比緝。別省流來安置之軍流人犯。曾否安分。如何存活。作何約束稽查。有無分派里甲輪流供給苦累里民之事。作何改辦。以蘇困累。地方同民。有無肆橫不法之事。

一地方私宰。作何查禁。有無牛牙通同積賊。剝賣賊牛之弊。或交界之鄰縣地方。有無此等竊牛偷割之處。保甲曾否力行。平時如何稽查。有犯曾否連坐。鄉約

總約保甲里長係何項人充當所司何事

一地方已犯積賊若干帶鈴示警若干或在鄉或在城或親族具保或鄉地具保如何安插約束有無營業不復爲竊地方有無積慣窩主庇賊及捕役勒索事主並不上緊捕賊之事

一賭博之事該屬多寡如何作何查拏作何完結市鎮有無搭廠押寶之事作何查禁衙役汛兵有無包庇分肥之事

一境內或專用制錢或兼小錢古錢有無私鑄私銷及攙搭砂錢之事錢價易銀貴賤若何若用錢大小不等如何折算民間貿易或多用錢或多用銀

一地方斂錢作會唱戲者多寡若干其夜戲曾否力行查禁。

一自理詞訟。幾日收呈。幾日批發。幾日審結。曾否遵例將已未完事件造冊通報。所造之冊有無遺漏。

一該屬居民皆築堡居住。是否聚族而居。有無宗祠聯屬。有無堡長練長。鄉約名色。此等人於一鄉令之勸諭。民人爲善。及雀角田產小事。令之解和。是否得資其益。

一養老育嬰。以及孤貧義塚等類。現在曾否建設舉行。已行者如何經理。費用足否。有溺女惡習否。

一境內何處最關要隘。與何縣接壤。或毗聯。何省汛防。

是否嚴密某某處水陸塘房幾間。是否現俱完固。巡防弁兵若干。有無偷安騷擾。強買強賣。縱容匪盜。坐地分肥等弊。各鄉有無白操鄉兵。各相防護之事。

一縣城幾里。或甌或土或石。設門幾座。是何名目。新舊完固。若何城門鎖鑰。作何責成掌管。

一境內除城廂而外。極大市鎮村堡。埠頭幾處。通何商賈。聚集何物。在縣何方。離城幾里。是何名目。煙戶約有若干。逐一開列於後。

一境內通衢橋梁道路幾處。何否修理平坦。有無過渡河道。或渡船。或設橋渡。係官設抑係私渡。有無勒索行旅及留難孤客之事。

一、驛站馬若干。夫若干。係通何處大路。何員經營。作何應付。大差作何辦理。僱夫之外。有無差用民夫。作何輪差。其草料作何購買。有無派買及借用民間騾馬之事。

一、地方有無衙蠹。棍豪。強。曾否查拏。如何處治。現在有無其人。有無恃眾行兇。不受鈐制之事。果有大奸巨棍。密開具稟。

一、行銷何處鹽引。遠近若何。鹽價若干。有何私鹽偷漏。鹽課如何輸納。境內當舖。城鄉共幾座。有無鹽當舖。節規。

一、境內分防。佐雜。巡檢。幾員。駐劄何處。在城在鄉。離城。

幾里有無衙署。所管何事。有無批查代勘代審之事。有無擅受民詞之事。

以上各條。皆州縣地方所必有之事。亦州縣官必須查辦之事。欲措施之有益於民。必情形之先明於心。未有不留心講求而能辦理妥當者也。

答門生王禮所問作令書

袁枚

書來問作令之道。甚勤且摯。夫吏治有不可學者。有可學者。天之生才。敏鈍各異。或應機立決。或再三思而後決。或臥而理。或戴星出入而後理。此豈可學哉。然行政之方。與安吏民之道。則循吏不同。同歸於治。今以縣令所當知。與才性無關者。爲足下告焉。夫治民者。州縣之

職也。然治民不自民始。胥吏者官民交接之樞紐也。家丁戚友又胥吏交接之樞紐也。不治胥吏不能治民。不治家丁戚友不能治胥吏。治家丁戚友胥吏奈何。用之而勿爲所用是已。其用之而勿爲所用奈何。曰通之而勿隔是已。官與吏終日見而無勞家人之轉通。官與民又終日見而不許胥吏之壅遏。則彼胥吏家丁戚友者不過供奔走佐使之職而已矣。而何弊之能爲。且夫用戚友不如用家丁。用家丁不如用胥吏。用胥吏不如用百姓。戚友果賢何所不可。如其不肖法難遽加。若家丁則利在前法在後矣。然家人之來去無常。胥吏之曹缺永在其畏法媚官甚於家丁較可用也。胥吏之職大

都拘人集眾。若受訟時。朱書牒尾。卽令某甲喚某乙。甯不省需索而免稽遲乎。是百姓尤可用也。吾不解今之爲政者。一則曰嚴胥吏。再則曰嚴胥吏。夫胥吏卽百姓也。非鬼蜮禽獸也。使果皆鬼蜮禽獸。宜早誅之絕之。而又何必用之而嚴之。周官所謂陳其殷置其輔。輔卽胥吏也。雖聖人不能不用也。然三代上有庶人在官之祿。今旣無之。則上之人宜爲若作設身想。而何嚴之爲。彼嚴者。豈不曰胥吏舞文乎。病百姓乎。夫使之舞文。病百姓者。官也。非胥吏也。試問已舞之文。判行者誰也。彼舞而我亦隨而舞之。不自責而責人何也。胥之權在行檄。役之權在奉檄。今之縣令。檄行若干。不知檄書云何不

知某當理不知某當銷又不知如是而欲除弊雖日殺百胥吏無益也夫欲大權在我莫如手記而手銷之以州縣之繁而謂事必親記似屬奢闊之論不知訟牒極多每日所進能過百紙乎百紙中其理者能過十事乎每日記十事未爲難也次日再收百紙大半覆詞訴詞其應記者又減十而得五矣受牒十日書所記而召之訊訊吏何以不行檄則吏窮訊役何以不集犯則役窮窮則免冠謝罪請嗣後十日內行檄集犯永爲例矣檄行犯集隨判而隨銷之任胥役之需索奸匪之僂張而不出十日之期則所費有限枝節不多其初情未改訊斷亦易彼百姓者知十日之必結也又何畏乎吏役而

賄之法立半年。可十日中竟無一事。此胥役之所大懼也。然民不告贓。上不訪吏。有提吾胥吏者。官自當之。不許胥吏索百姓之錢。亦不許上官胥吏索胥吏之錢。彼胥吏者。不懼於始而感於終乎。康誥曰。要囚。服念五。六日。至於旬時。非速結之義乎。夫可以探喜怒。轉關鍵者。胥吏也。有減增有株引者。檄稿也。有移換有竄入者。供詞也。有暗阻有明催。或早或遲者。訊期也。吾一切日覽而親裁之。許一檄不許重檄。檄中人數空之。而待親裁。差某役亦空之。而待親裁。內銷外結。檄焚卷撤。彼胥吏何權焉。於胥吏又何誅焉。今之州縣。非不勤也。所惜者精神在上而不在下耳。不知上行不答。則嚴飭至內。

幕外胥。俱能相促。惟夫寡妻弱子。鄉民村戶。不遠百里。而來望官。如望歲。而又無門投刺。不爲之結。於浹日以內。吾心安乎。政綱既舉。首清刑罰。清之云者。非寬減之謂。得當之謂也。皋陶曰。罪疑惟輕。言罪之疑者。輕之。其不疑者。不輕也。孟子曰。省刑罰。言省察之。不使刑罰繁也。蓋刑以戒惡也。刑繁則不足以懲惡。而轉生刑之惡。以爲吾旣已受刑。而無所損矣。尙有懼哉。以此生痕瘡。而逞毒淫者。比比焉。要知刑具而部頒之。亦無庸也。夫物之不齊。物之情也。彼衣冠辱民。加細荆而呼號不勝。何事於部頒之具。積蠹大猾。其筋骨皆習練之餘。當巨梃而含笑。囊三木而無聲。何畏乎部頒之具。吾以爲其

畏者雖應答亦宜寬省以洒其恥其玩刑者法止杖四十而吾以二十當之其酷則更甚於四十使彼知二十之委頓如此也況四十耶乃懍懍乎懼心生而惡念除矣凡判尾必親書識非炫才也以便日後展卷而了然也判事必坐堂皇非矜眾也以觀國人之顏色而是非使共見也勿輕置人於獄非徒仁也所以清狴犴而防雜處之不虞也勿輕申詳非專擅也所以免捉搦而成難結之案也勿問坐獄者之貧富恐有成見而誤大公也勿故反聽請者之勾求恐事未可知而矯枉過正也勿勸捐以安富恐抑勒者多勿罰鍰以遠嫌恐徇財者惑勿交鎖鍊於胥役必內存之當用者加朱墨圍使不

得、開、不、當、用、者、不、署、鎖、字、使、不、得、混、勿、委、監、獄、於、典、史、
必、驟、臨、之、審、其、輕、重、辨、木、索、之、有、無、觀、其、氣、色、知、衣、糧、
之、剋、扣、孔、子、曰、聽、訟、吾、猶、人、也、必、也、使、無、訟、乎、此、聖、人、
甚、言、無、訟、之、難、非、言、聽、訟、之、易、也、今、之、人、不、能、聽、訟、先、
欲、無、訟、不、過、嚴、狀、式、誅、訟、師、訴、之、而、不、知、號、之、而、不、理、
曰、吾、以、息、訟、云、爾、此、如、防、川、怨、氣、不、伸、訟、必、愈、多、不、知、
使、無、訟、之、道、卽、在、聽、訟、之、中、當、機、立、決、大、畏、民、志、民、何、
訟、耶、所、謂、側、弁、圻、顏、不、投、於、明、鏡、是、也、然、而、一、開、之、獄、
情、僞、萬、出、或、在、案、中、或、在、案、外、聽、之、者、恃、才、恃、氣、恃、廉、
恃、公、皆、不、足、以、聽、也、虛、以、受、之、靈、以、應、之、周、詳、以、求、之、
旁、見、側、出、以、察、之、庶、足、以、聽、也、大、凡、事、過、而、嘗、自、悔、其、

誤者其誤常少。此所謂政如農功。日夜思之者也。事過而常自信。無一事之誤者。其誤必多。此所謂氣矜之隆。秦人視越人之肥瘠者也。對簿之民。宜分爲六重者。獄其次繫。其次管守。其次保釋。其次待喚。其次聽其所之。數者能臨事料量。而不容胥吏持之。則聽訟之道。思過半矣。和息非不可允。但須書明。曲直以防。日後之終凶狎邪。非不當嚴。但須戚屬投明。不許匪人之恫喝。律設大法。而通融者存乎人。否則傀儡而已。案無確據。而闕疑者。法乎史。否則武斷而已。觀漢江充之巫蠱。而知賊之可裁也。觀南史傅炎之斷獄。而知兇器之難據也。天性之親。衆而不殊。雖父訴子。亦使自答。否則傷慈愛矣。

墳田之事勘而後斷。雖風霜寒暑不可辭勞。且借以巡鄉村矣。刑名之外。則有錢穀錢穀役侵者多。民負者少。比役無益也。役又借比以索民錢。善催科者不輕比役。但擇其負多者。召花戶而欲見之。吾未見真花戶來而稅不登者也。慮飛灑則細刊科則。昭示鄉氓。防重耗則突取衡平。辜較一二所謂催科中寓撫字也。百姓之上。尚有紳士。凡今之閉門塞竇而不見客者。其中有所不足也。古人於一邑之中。有鄉先生。鄉大夫。歲時伏臘飲酒習射。當其時。豈有苞苴竿牘之嫌乎。作吏者。日對里魁伍伯。而不親賢士大夫。不特天闕下情。亦且無以自輔。記有之曰。貴貴爲其近於君也。尊縉紳卽所以尊

朝廷其生童皆吾子弟亦宜月課季試以無失黨庠術序之義漢吳公治行號第一而史只載其薦賈生一事此其故可思也總而論之爲政在外尤須爲政在心心正則羣邪消心和則眾善集心周於庶務而法令不必苛煩也心淡於榮祿而上官無所挾持也大府一過而廉從之誅求無厭知我之巡鄉亦猶是也崇轅一入而守候之饑渴無時知民之望我不甚殊也威可使人畏不可使人恨恩可使人感不可使人狎廉不自知者廉之眞公不自恃者公之大民信則順風而呼吏服則指臂可用告示爲吾之仁言不必輕發而發必手書訪問非政之大體行或偶然而行必眞確求心安不求名重

察物議並察邇言。仁無術而不行政師古而毋泥。吾之所行者在是矣。吾之所能言者亦止於是矣。若夫神而明之化而裁之則在吾子。

袁簡齋一生著作只是此件有益世人。

陞遷

潘杓燦

詩曰靡不有初鮮克有終。晚節末路之難古今共之。蓋習久者易怠志滿者易驕。成功不慎而怠與驕萌不幾山虧一簣乎。尤貴豫先時之計慮。留後日之諷思。述陞遷。

任內錢糧每年雖有奏銷清冊。然存留放給不無挪借透欠之款。今任事將終不可不通盤打算。使條條皆有。

著落項項皆是全完不特不予後官以捐勒之端亦不可致胥役畱爲口實於陞前細將挪借透欠一一開出逐件清楚或應撥補或應抵還或追還官或令補領其挪借二項若憑上行方始通融者原屬一丁一孔申請開銷尙易補還惟是透支欠給之間須商酌妥確或透者不能卽有還官欠者未能卽有實給或可曉以情理令同役親友立約對會使透者徐扣工食以償欠者欠者出領以黏卷中蓋前官欠給之款後官必不補給今立約對會雖遲時日終有領期先有虛收而漸實受亦易樂從也至有私借私挪無透有欠須豫先設法補苴彌縫無隙倘畱可議之端俟後官查出詳追彼時必出

已資補庫更添一參駁之醜矣。

清錢糧

錢糧既清即可令厯年收管書吏將任內交盤底冊攢造止畱本年底冊以待去任之日扣定真數方始實造。蓋厯年底冊既成即可謄寫而本年冊底無多造亦易竣倘上司肯令署官收受則數目可以交出矣。

造交盤

積穀原無額數各里捐輸在簿有名而未交納者於解任之年須上緊勸輸銷簿久催不完者於去任之日開示免納勿爲里蠹中飽每年倉廩定有餘糧如存畱續放之米未及放完而要離任當先查算明白扣存倉中

正用毋使胥役暗自收肥。

查積穀餘糧

欽部憲件不完不能離任任既滿宜嚴查速結以副陞

選部憲件

憲件久拘不到者。必是兩造俱不欲審。賄差延閣也。每季將終。卽行查理。果係些小之事。當挂示註銷。今將離任。豈可仍留牌票於胥役之身。令其需索無已。除人命強盜逃人十惡等事。開造交與接官審理。其一應戶婚田土鬪毆錢債細事。久拘不到者。俱出示註銷。原牌弔毀。卽有難已之事。聽其於新官告理。銷號

每逢酷熱嚴寒之時。監中可放之囚。自應保放。今當去後。更要徹底激清。除死罪未決軍徒未解。欽部憲件未結。以及寄監犯人。開造交盤一冊。送與後官。其餘上司贓贖人犯。宜取的保。職行小罪人犯。盡行釋放。清監

欽部憲件贓贖久追不完果係家產盡絕者亦准詳請免追載在則例今將去任宜擇上項久逋贓贖令本犯投具家產盡絕呈詞申詳請免詳請不准交與後官追納其職行自問贖銀於交印之日盡批豁免告條曉諭卽入官之贓不報上司者亦同免追蓋此等贓贖原不

開入交盤徒令胥役賣放不若明免爲妙

免贖

逐日買辦行鋪俱著親領現銀今將去任仍恐奸盜有借稱新陞上任送禮名色騙取什物宜出示曉諭曉諭行鋪去任之時內衙丁僕有將衙署門欄作柴薪者有信忌諱恣意毀壞者有將花卉樹木斫伐者意在不肯開墾後人不知一草一木皆朝廷賦稅百姓脂膏所成恐

任以來享用已久。今將去任。當思報國恤民。果有事不稱職。猶當自愧。奈何以有用之物。任情暴殄。又復累民修葺耶。況後官與己原無讎怨。小量至此。可發大笑。宜先示禁約。實貼三堂。禁止租隨所限衙署

報陞已後。上司既有知照。須往謁謝。數日內卽清理。一應未完。令有頭緒。悉到宜先具詳文。通詳院司道府。請選委賢能署印。以便出缺。若相好上司處。詳文外更須加一委曲稟帖。懇請早使交代。蓋既有陞任。自當速赴。恐日久又有盜案。逃人黏滯也。請署員

衙署中有借辦行鋪木植棚廠等物。示期親領。恐出衙之後。卽爲吏胥乾沒。過歸於己也。還借辦

出缺之後必有除補者探聽的實具書啓令頭接人遞送須要言詞溫潤禮數周全倘接任之後有未完事件正資料理且交盤一節多有故意興難者務使相好則接受自易

接新官

役吏終任追隨臨行之惠不可不及其黠者必以事件乞恩庸者未必有事干瀆衙中自辦粗用器皿難以持帶新任者不必算小變賣宜分賞不會乞恩之人一以存去思一以示公溥

賞役吏

署員有人俟其擇日受印如日期擇得遠當行文催之及期將印洗驗明淨入匣中加印封依儀注交與署員出文中明各憲交印

離地方之時。必須向文廟各上司及縉紳處辭行。同城
之上司。印既交卸。卽須叩桌謝事。謝上

牧令書輯要卷一終